

नमो तस्य भगवतो अरहतो सम्मासम्बुद्धस्य ।

धर्मकान्त्रिका



वर्ष ६

पूर्ण संख्या १०६

दिल्ला



बुद्ध संवत् २५००

नेपाल सं १०७६

दच्छिया चन्दा ३)

नेपाले मोरु ४)

छगू अंकया १=)

धनः-पौ

विषय	पौत्र्या:	विषय	पौत्र्या:
बुद्ध-वचनामृत		सगं (कविता) — श्री कैलाशराम	४६३
बौद्ध धर्म व आधुनिक युग — भा. रा. हि. भगवान् सहाय	४५८	भाषण — साहित्यसिरोमणि चित्तधर 'हृदय'	
भीथाय (कविता) — भाषारत श्री फतेबहादुर सिंह	४६१	२,५०० गूगु जयन्तीया विस्तृत समाचार —	४६४
नेपाले धार्मिक सहिष्णुता — कविरत्न श्री सिद्धिचरण	४६१	सम्पादकीय —	

ग्राहक जुया दिसँ !

भारतया राष्ट्रपति डा० राजेन्द्र प्रसादं निसें क्या अनेक मान्यवर, पत्रकार, साहित्यकारपिनि पाखें धन्यवाद प्राप्त जूगु, छप्वाः म्हुतुं धयाथें खंक व स्वकसिगु पाखें प्रशंसित 'धर्मोदय' या २,५०० गूगु स्वाया-पुन्ही उपलक्षे प्रकाशित विशेषांक प्राप्त याना दीसा याकनं ग्राहक मजूनि मजूनिपिं भाजु मयूजुपिं ग्राहक जुया दिसँ । थव देँ ग्राहक जुइपिंत थव विशेषांक साधारण मुल्यं प्राप्त जुइगुलि अतिरिक्त 'धर्मोदय' दूवारा विश्व बौद्ध सम्मेलन सम्बन्धी अंकं, नारी अंकं नं आपालं लाभप्रद सिद्ध जुइ ।

कार्यालय—४, रामजीदास जेटियालेन, कलकत्ता—७

यें —

- १—भिक्षु सुबोधानन्द, श्रीघः विहार
- २—श्रीसाहु हर्षरत्न, असन टोल
- ३—चन्द्रकुमार वज्राचार्य, ७७१ नं० बसन्तपुर
- ४—श्री प्रेमबहादुर कंसाकार, केल मासंगली
- ५—श्री लोकरत्न तुलाधर, असन चलाढें

यल —

- ६—श्री भक्तकृष्ण उपासक, १४६ उखालखु
- ७—श्री मोतीरत्न, खपिछें
- ८—श्री पद्मरत्न शाक्य, हःखा

ख्वप —

- ९—भिक्षु रत्नज्योति, मुनि विहार, इनाचा टोल
- १०—नेपाल साहित्य मन्दिर, खौमा टोल

भोंट —

- ११—श्री वर्णवज्र वज्राचार्य, स्वधा टोल

पः १ नं० त्रिशुली —

- १२—श्री वेखारत्न शाक्य, त्रिशुली बजार

तानसेन —

- १३—भिक्षु शाक्यानन्द, आनन्द विहार
- १४—श्री सानुकाजी नीरकाजी, भीमसेनटोल

भोजपुर —

ग्राहक याना दिसँ !!

१५—श्री हेमबहादुर शाक्य, टक्सार टोल
चैनपुर —

१६—श्री जुद्धपति त्रिलोकप्रसाद, चैनपुर बजार
बीरगंज —

१७—श्री लक्ष्मीप्रसाद श्रेष्ठ, मीनाबजार
मिफेरी —

१८—श्री रूपज्योति वज्राचार्य, सोना चांदी
ज्यासल, मिफेरी बजार

सिक्रिम —

१९—श्री नरेन्द्रनरसिंह शाक्य, रंगेली बजार
कालिम्पोंग —

२०—धर्मोदय विहार, कालिम्पोंग
दार्जीलिंग —

२१—श्री संघमुनि कंसाकार, एम० टी० रोड
तिब्बत —

२२—श्रीसाहु त्रिरत्न, धाकं छोकं
कपिलवस्तु —

२३—श्री मंगलमान वज्राचार्य, तौहिवा बजार
विराटनगर —

२४—श्री जनकदास श्रेष्ठ, विराटनगर
—ठयवस्थापक

MESSAGE FROM HIS MAJESTY THE KING OF NEPAL.

It is a matter of pleasure to me to hear of the special number of this magazine. My thanks to you all for the proposed publication of the special issue which will help the people in general to have an idea of the significance of 2,500th year of Maha Parinibban of Lord Buddha. I hope and believe that this special number going to be issued on the thrice blessed Day of Vaisaki-Purnima will not fail in inculcating the principles of peace and non-violence which are essentially needed at present.

श्री ५ महाराजधिराजयागु सन्देश

थवं पत्रिकाया विशेषांक पिहौँ वथा च्वनं धाःगु न्थना।
जित साब हर्ष ज्ञानु दुः। थवं विशेषांक पिहौँ वशगुलो भग-
वान् बुद्धया २,५०० वर्षां अहापरिनिवारा वर्षया अहत्वं अनूत
सकसितं सोकेगुलो सहायता बोगु जुथा निंति द्विपि सक-
सितं जिगु अनेक धन्यवाद दुः। जिगु आशा वं विश्वास
दुः, त्रिगुरा सम्पन्न ईकांथा-पुन्हो खुनु पिहौँ वशगु थवं
विशेषांकं दथा, शान्ति, अहिंसा, गुगु कि थाँकन्हेथागु
कालयात अदयेकं अगाना च्वंगु दुः. फैले थायेगुलो ल्यूने
लाई अखु।

विशेषांकया निंति वःगु निगुलि सन्देश भति विलम्बं प्राप्त ज्ञानुलि थवं अंके
प्रकाशित यानाच्वना।

—सम्पादक

RAJ BHAVAN,
BOMBAY-6,
15th May, 1956.

The life and message of Buddha still inspire millions of people whom the modern civilization has not yet touched in the far off jungles and forests in India where Buddhism is said to have disappeared. That at one time Buddhism was the mass religion of India followed even by the most primitive tribes is evident from the fact that the image of Buddha is even now worshipped under different names in different places by the tribal people living in forests.

How is it that this particular religion spread so far and wide and captured the mind of the people although they did not understand the intricate philosophy of the religion? It is said that during the rule of Ashoka the entire governmental machinery was used for the spread of this particular religion. But we know that this is not possible. Even under the most systematic administration of the modern days every part of the country is not yet touched by the administration. How is it then that the worship of Buddha spread far into places where there was no communication and no touch of the administration in those days? The more I think over this interesting phenomena, the more am I convinced that the love and sympathy, which is the divine link between man and man, is not deterred by the barrier of time and space: it travels far and wide and finds a responsive chord in every human heart wherever it reaches. It is, so to say, carried by the wind.

This happened to a surprising extent with regard to Gandhiji. People in far off forests, where no outsider has ever gone, knew Gandhiji's name and knew also that he stood for the poor and the distressed. The same was the case with Buddha on a much larger scale.

During the period of reaction systematic efforts were made to root out Buddhism and, therefore, Buddha assumed different names. Nevertheless, his image continues to be worshipped. His message of love and sympathy has become mixed up in the Indian life itself.

Now is the time when the same message has to be repeated and broadcast on the same scale as was done before. The distinctions of caste, creed and sect will have to disappear like mist in the blazing sun of the Buddha's message. On the occasion of his 2,500th anniversary, let us remember that the Great Master who came to the world for a few years and has now passed into ages, has left behind the divine treasure of love for eternity to enjoy.

H. MEHTAB.
GOVERNOR OF BOMBAY.

च्वसापासा

१०५०



मी दू लु



“भासये जोतये धम्मं”

सहायक सम्पादक :—भिक्षु महानाम “कोविद”

सहायक सम्पादक :—मुदशीन आमणेर

वर्ष ६

कलकत्ता

आषाढ़ वि० संवत् २०१३
जुलाई ईसवी संवत् १९५६

अङ्क ६

धम्म-वन्ननामृत
Dhamma.Digital

“...छुँत प्यंगू प्रकारयापि दु। छगू प्रकारयापि उजापि, गुपिसं थःथमं म्हुया प्वा: खना छें दयेकी तर उकी थःपि च्वनी मखु। निगू प्रकारयापि उजापि, गुपिसं थःथमं म्हुया प्वा: खनी मखु, तर थःपि धाःसा उकी च्वनी। स्वंगू प्रकारयापि उजापि, गुपिसं थःथमं म्हुया प्वा: खना छें दयेकी, हानं उकी थःपि च्वं नं च्वनी। प्यंगू प्रकारयापि उजापि, गुपिसं न म्हुया प्वा: खना छें दयेकी, न थःपि हे च्वनी।

मनूत नं थुकथं हे प्यंगू प्रकारयापि दु। छगू प्रकारयापि इपि, गुपिसं शास्त्र व्वनी, तर सिद्धान्त-यात हृदयंगम याइ मखु। निगू प्रकारयापि इपि, गुपिसं शास्त्र मब्बंसां आर्य सत्यया अनुभव याना च्वनी। स्वंगू प्रकारयापि इपि, गुपिसं शास्त्र नं व्वनी, हानं आर्यसत्यया अनुभव नं याइ। अले प्यंगू प्रकारयापि इपि, गुपिसं न शास्त्र हे व्वनी हानं न आर्यसत्यया हे अनुभव हे याइ।...”

—पुण्गल पञ्चति

बौद्ध धर्म के आधुनिक युग

भारतीय राजदूत हिंज एक सलेंसी श्री भगवान सहाय

[२,५०० गृगु स्वांया-पुन्हीया महोत्सव सिलसिलाय् तुं
यले बूवहाले जूगु बौद्धसम्मेलने प्रवर्चित]

नेपाल व भारतया हे जक मखु विश्वया इतिहासे भगवान बुद्धया निर्वाणया २,५०० दँ क्यंगु तिथिया दिं तसकं महत्वपूर्ण जू, महिमामय जू । थव हे दिने छद्धा मनुखं थःगु साधनां भगवान जुया मानवतायात अमर ज्योतिया वरदान विया बिज्यागु खः । थव हे दिनं निसैं धर्म व संस्कृतिया ऐतिहासिक रूप दःवंगु खः, सत्य साकार जूगु खः, अले करुणा हिकुहिकुलंगु खः । वैदिक युगया कर्मकाण्ड व हाहाकार पूर्ण बलि, यज्ञ अले अंधविश्वासे सुकुसुकु ख्वया च्वंपि जनतायात परम शान्तिया मंत्र बीगु व दके न्हापांगु वाणी खः—

‘न हि वेरेन वेरानि सम्मन्तीध कदाचनं
अवेरेन च सम्मन्ति एस धम्मो सनन्तनो ।’

अर्थात् वैरं वैरं गबले शान्त जुइ मखु, अवैरं (प्रेम) हे शान्त जुइ, थव सनातन धर्म खः ।

थ सिबे बालाक सनातन धर्मया परिभाषा जुइ फइ मखु, गुगुलि देश, काल, ज्ञाति वर्ग आदिया संकीर्ण सीमात पुलाः विश्वया समस्त मानवतायात छपु सूत्रे चीफइ, प्रेमया निर्मल धारां जीवमात्रयात अभिषेक याये फइ, हानं व प्रेमया निति (मनू) म्वाये थ फु, व हे प्रेमया निति सी नं थ फु ।

थ हे दिने ८० दँया उमेरे (४८३ ई. पू.) भगवान बुद्ध शरीरया बन्धनं मुक्त जुया बिज्यात । ४५ दँ तक छेंखा छेंखा चाहिला वसपोलं मानवताया ख्वबि हुया बिज्यात, दुखीपित धैर्य विया बिज्यात हानं निरीहपित शान्ति प्रदान याना बिज्यात । परम्पराया थव संयोगयात छु धका धाये, गुगु भगवान बुद्धया जीवन-ज्योति पायच्छि ८० दँया अवस्थाय् भीगु न्होनैं निर्वापित जुल । वसपोलं तुती चिना तःपिं दुःखीपिनिगु धाले मलहम तया, विधवा-पिनिगु ख्वबि हुया तथा अनाथपित प्रेमं आश्रय विया छें छें चाहिला बिज्यात । थुकथं भीत भगवान बुद्धया परम्परा अमरता स्पष्ट खने दइ, वसपोलयागु करुणाया दिव्य-भलक खने दइ, हानं सत्य, अहिंसा व प्रेमया सार्थकता सिद्ध जुइ ।

थौं नीन्यासः दँ लिपा हानं संसारया कुना कापिचां भगवान बुद्धया आरती यायेया निति मत च्याकावं च्वन, हानं थव छुं साधारण खं मखु, न गुंगु पुलांगु मिथ्या परिपाठीया नकल हे खः, वरन् आधुनिक युगया छगू तःवंगु ऐतिहासिक मांग खः । वंगु महायुद्धं लिपा युद्धया विभीषिकां संसार थपाय्सकं त्रस्त व भयभीत जुल कि एटमबम व हाइड्रोजन बमयागु कुं धुरके मालेवं वं अयथय् हे धाये मफुत अर्थात् व इतिमिति कन । मानवता थःगु अस्तित्वया निति छटपटे जुल, अले हानं सकसिगु आत्मां खालि छगू हे जक सः प्रतिष्वनित जुयावं च्वन—शान्ति, शान्ति, शान्ति । थुजागु अस्तव्यस्तताया युगे शान्तिया महामहिम प्रवर्तकयात लुमनिगु हे जुल । नीन्यासः दँ मानवताया अनन्य उपासकया विह्वल वाणी थौं नं स्पष्ट व न्हूगु जुया च्वं च्वन, उकी भतिचा हे अस्पष्ट व पुलांपहः मवः । चिंतनया थव हे न्ह्याबलें स्पष्ट व न्हू जुया च्वनीगु ख्वभाव हे बौद्धधर्मया विशेषता खः । थौंया युगे बौद्धधर्मया थव प्रगतिशील विचारधारायात थुइकेगु भीगु निति तःसकं आवश्यक जू ।

भगवान बुद्धया दार्शनिक सिद्धान्तया थौंया युगया विचारधारा नाप तारतम्य स्थापित याये न्हो थव सीकेगु आवश्यक जू, धर्म व दर्शनया गम्भीर विवेचना बाहिक वसपोलं निगू थुजागु युगान्तकारी ज्या याना बिज्यात, गुकिं धर्मयात धारण याये बहःगु याना बिल, हानं दर्शनयात निंहिन्हिया जीवन-मित्र याना बिल । वसपोलयागु धर्म संप्रदाये (विहारे) कुंका च्वनेत मखु, हानं वसपोलया दर्शन विद्वानपिनि सफुली किका च्वनेत नं मखु । अस्तु, न्हापां ला वसपोलं मानवमात्रयात असीम आत्मविश्वास प्रदान याना बिज्यात अले मेगु फुक धर्म व दर्शनया कसौटी बहुजन हिताय, बहुजन सुखाय हे यात । वसपोलया मानवताया कल्याण जुइगु संदेश छेंखा छेंखाय् थ्यंका बी मार्तवेः, उकिं वसपोलयागु आग्रह खः, थःगु उपदेश जनताया भाषां हे बीगु, सःस्यूपिनिगु व थाकुसे च्वंगु भाषां मखु ।

न्ह्याना च्वंगु जीवनया निति न्ह्याना च्वंगु भाषाया हे

आवश्यकता दु । न्हापांगु खँ ला थौया वैज्ञानिक युगयात दक्षिणे महत्वपूर्ण देन खः । भगवान बुद्धं हे दक्षिणे न्हापां मनूयात थःगु बुद्धि-बलया निश्चित विश्वास व्याकेगु स्यना बिज्यात । वसपोलं स्वयं सुयागुं सिद्धान्तयात नं मिखा तिस्सना स्वीकार याना बिमज्याः, अपितु थःगु प्रवचनया निंति हे नं धया बिज्यात, “जिगु छुं खँयात थ्व कारणं माने याये मत्य कि व भगवान बुद्धं थथे धया बिज्यात, वरन् उकियात थःगु बुद्धिया कसौटी च्वला स्व अले गन तक थुइके फु, अन तक स्वीकार या ।” संसारया धर्मसंस्थापक मध्ये खालि बुद्ध हे छ्रह्म थुजाह्म खः, गुह्यसिनं मनुष्यया सम्बन्धे सामंजस्य हयेत परमात्माया मध्यस्थता स्वीकार याना बिमज्याः । वसपोलं मनूयेगु समस्याया समाधान लौकिक स्तरं हे याना बिज्यात, वसपोल अलौकिक चमत्कारया त्यूने ब्वां बिमज्याः । वस्तुतः वसपोल सहज विचारक खः, वसपोलयागु उपदेश फय् व लःये नैसर्गिक खः, उकिं वसपोलं थः नायः जुइगु वथः तःधं जुइगु गबलैं विचाः याना बिमज्याः, भं आनन्दया छ्रलपोल मदयेवं छु (गय्) जुइ धयागु जिज्ञासाय् वसपोलं स्पष्ट लिसः विया बिज्यात, ‘आनन्द, (जि मदयेवं) गुरु मंत धका संमझे जुइ मत्य । जि गुगु धर्म विनय उपदेश विया, व हे जि मदयेवं छ्रिमि गुरु जुइ ।’

ज्ञानया क्षेत्रे भिंखुगृगु शताब्दी यूरोपे गुगु जिज्ञासा वृत्ति (Spirit of questioning) या प्रादूर्भाव जूगु खः, हानं बुद्धिया गुगु आत्मनिर्भरताय् वैज्ञानिक युगयागु समस्त वैभव विकसित जूगु खः उकिया मूलभूमि भगवान बुद्धं इसा सिबे गुलिखे सदि न्हापा प्रतिष्ठित याये धुंकल, थ्व लुमकेबले आश्र्यं जू । उकिं हे वसपोलं धया बिज्यागु खः ‘मिश्रुपि ! बुद्ध, धर्म व संघया विषये छ्रह्म मिश्रुया जक शंका दुसां न्यं’ थ्व सदाशयता थुलि चक्कं कि गुह्यसिथाय् भोजन याना वया थःत अत्यन्त कष्ट जुइका शरीर त्याग याये माल वयागु प्रति चिन्तां थः द्रवित जुया धया बिज्यात, ‘आनन्द ! चुन्द कुमारयागु शोकयात मदयेका व्यु, (छं) धा, आवुस ! छंत लाभ हे जुल, छं भिंगु लाभ यात, क्वाय् धा:सा छंगु पिंडपात्रया भोजन याना (तथागतं) परिनिर्वाण प्राप्त याना बिज्यात ।’

भगवान बुद्धिया जीवने कठोर बुद्धिवाद व कोमल मानवीयताया अद्भुत समन्वय दु । भारतवर्षया सांस्कृतिक महत्वया मूल शक्ति (नं) समन्वये हे अंतर्निहित जू । रामायण, महाभारत, गीता फुकं समन्वयया हे ग्रन्थ खः ।

भगवान बुद्धिया मध्यम-प्रतिपदाय् फुक साधनाया सार दुपिना च्वंगु दु । छ्रखे ला वसपोलं कामवासनाया सुख लिप्साया अतिथात वजित याना बिज्यात । हानं मेखे पाखे शरीरयात दुःख विया साधन याइपि मूर्खतय्गु अतित्वयात नं निन्दा याना बिज्यात—“मिश्रुपि ! थ्व निगू प्रकारया नं अन्त पाखे मवंसे तथागतं मध्यम मार्ग लुइका बिज्यात, गुगु मिखां खंका बीगु, ज्ञान दयेका बीइगु, शान्तिया निंति अभिज्ञ जुइया निंति, सम्बोधया निंति निर्वाणया निंति, खः । थ्व छु मध्यम मार्ग, मध्यम-प्रतिपदा गुगु तथागतं माला लुइका बिज्यात ? व थ्व हे आर्यअष्टांगिक मार्ग खः—सम्यक् दृष्टि, सम्यक् संकल्प, सम्यक् वचन, सम्यक् कर्म, सम्यक् जीविका, सम्यक् व्याशम, सम्यक् स्मृति, सम्यक् समाधि ।”

वास्तवे बुद्धिया धर्म आचरणे आधारित जुया च्वंगु दु, खालि सिद्धान्तपक्ष ज्वना वसपोल ब्वां बिमज्याः । सक्रियता हे वसपोलयागु दक्षिणे तःधंगु शक्ति खः । वसपोलं धर्मयात द्रंगाधें माने याना बिज्यात, गुगु (खुशि) पार जुइ धुनेवं छ्यले तया जुइत मखु । सिद्धान्त व प्रयोगया थ्व सार्थकताया निंति हे वसपोलं धया बिज्यागु खः—

“ न तावता धम्मधरो यावता बहु भासति । यो च अप्पम्पि सुत्वान धम्म यायेन पस्सति स वे धम्मधरो होति यो धम्मं नप्पमज्जति ।”

अर्थात्—आपालं खँ ल्हायेवं धर्मधर जुइ मखु, गुह्यसिनं भतिचा जक न्यनासां शरीरं धर्मया आचरण याइ हानं गुह्यसिनं धर्मे द्रंकी मखु, व हे धर्मधर खः ।

थौं गुगु पंचशीलया भावना सारा संसारे प्रसार जुयावं च्वंगु दु, उकीया मूल प्रेरक भगवान बुद्ध हे खः । ध्यान पूर्वक स्वयेव प्रजातंत्र व समाजवादी दर्शन भगवान बुद्धिया मानववादी चिंतन परंपराया हे विकसित रूप खने दःवइ । जीवनया क्षणभंगुरतां आकुल जुया वसपोलं गुगु क्षणिकवादया स्थापना याना बिज्यात उकियात हे वैज्ञानिक रूप बीत वसपोलयात प्रतीत्य समुत्पादया प्रतिष्ठा याये माल । थ्व कारण-कार्यया पद्धतिं विश्वया गतियात थुइकेगु प्रयत्न तसकं हे वैज्ञानिक व स्वस्थ चितंनया परिचायक खः । थ्व हे विचारधारां बुलुं द्रन्दात्मक भौतिकवादया परम्परायात बुइके फत । मावसं हेगोलया दर्शनयात व्यवस्थित याना समाजवादया मूल-भूत सिद्धान्तया प्रतिष्ठा याःगु खः । थ्व सुनां स्यू, हेगल बुइयां भिंस्वंगू शताब्दी पूर्व बौद्ध संस्कृती छ्रह्म मेह्म हेगल धर्मकीर्ति बूगु दु, सुयात बुइकूगुया छगू मात्र श्रेय

बुद्धदर्शनयात हे दु। जन जीवनया समस्यायात मख्येकूसे सरल रूपं समावान यायेगु निंति हे बुद्धं आर्यं सत्यं प्यंगूया स्थापना याना बिज्यागु खः—

१. न्हापांगु आर्यसत्य—संसारे दुःख दु।
२. निगूगु आर्यसत्य—दुःखया मूल कारण तृष्णा दु।
३. स्वंगूगु आर्यसत्य—मनूया दुःखं छुटे जुइ मास्ते वः।
४. प्यंगूगु आर्यसत्य—दुःखं मुग्ध जुइगु उपाय अष्टांग-मार्ग खः, सत्यं हष्टि, सत्यं संकल्प, सत्य-वचन, सत्य-कार्य, सत्य-आजीविका, सत्य-व्यायाम, सत्य-स्मृति, सत्य-समाधि।

चक्रवर्तीं जुजुं नैं व बास्या चक्रं थःगु प्रभुता स्थापित याइ, तर भगवान बुद्धं धर्मया चक्र चले याना बिज्यात—‘धर्मं चक्रं पवत्तन्।’ नैं व बास्या चक्र ला स्वस्वं खने मद्या वन तर थ्वं धर्मया चक्र, प्रेमया चक्र, शान्तिया चक्र हानं अहिंसाया चक्र, थौं नं हृदयं हृदये च्वं च्वन। धात्येयागु खँ ला थ्वं खः कि प्रत्येक महापुरुष थःगु समयं परिस्थितिया उपज जुइ। गबले गबले संसारे ईर्ष्या, द्वेष, मद, मत्सर व हिंसाया एकाधिकार जुइ, अबले अबले वयागु आत्मायात संबोधं प्राप्त याकेत सुं बुद्धया अवतरणया आवश्यकता जुइ। थौं युद्धया विभीषिकां जर्जर, हिं बुत्तुबुला च्वंगु विश्वयात हानं सुं करुणामय बुद्धया आवश्यकता प्रतीत जुया च्वन, उकिं हे २,५०० दँ लिपा भीगु दुने हानं वसपोलया आह्वान

व पूजनया भावनां न्व्यलं चायेका हल। थ्व दिं उगु महान तपस्याया देन खः, गुद्धसिगु निर्वाणया ज्वालाय् थौं न शुद्धोदनया ममत्व, यशोधराया करुणा, राहुलया वात्सत्य दन दन छूवया स्वच्छ-स्वर्णं जुयावं च्वन। धात्येह्मा बुद्ध जुइ फइगु छुं अःपु मजू। बौद्धधर्मे दुःखं मुक्ति प्रदान याइपिं श्रावकतयेगु स्वंगू रूप माने याना तःगु दु। (१) अहंत, (२) प्रत्येक बुद्ध, (३) सम्यक् सम्बुद्ध। गुद्ध स्वयं जीवन मुक्त जुइ मास्तेवः वयात अहंत् धाइ, गुद्ध स्वयं जीवनमुक्त जुइ हानं नाप नापं मेपिनिगु दुःखं कष्टयात नं मदयेकावं वनी वयात प्रत्येक बुद्ध धाइ (?) हानं गुद्धसें अबले तक मुक्तिया कामना याइ मखु गबले तक संसारया पापी स्वया नं पापीह्म प्राणीं न निवाण प्राप्त याना आवानमनं रहित झुइ मखु (वयात बुद्ध धाइ?)।

विश्वया मानव मात्रया दुःखया परित्राण यायेगु संकल्प ज्वना हे भीसं बुद्ध जयन्तीया पवित्र समारोह माने याना च्वना। थौं भी सकसिनं संकल्प यायेमाः कि गबले तक थ्वं दुःखया दावाबिनं मुग्धगु संसारे अहिंसा, करुणा, शान्ति व प्रेमया वर्षां न्हूगु वसंत हइ मखु, अबले तक दी मखु तथा भगवान बुद्धया सिद्धान्तयात हानं छको विश्व कल्याणया निंति प्रचारित याये फयेमा। भी बुद्धया शरणे वने। बुद्ध-धर्मया अमर सिद्धान्तया भीसं आश्रय काये।

Dhamma.Digital

कीथायु

कै रायु तायदु मी थाय डे कै
हूलन फलियाय मुगलु च्यापि
म लदायाय सो हर हर न्हूपि
कै रायदु तायदु मी थाय डे कै
निरिसाया ई चान्है न्हूपि
मवा चयपुरा लैदैवय लैदै
कै रायदु तायदु मी थाय डे कै
महान न्है वह यह यह लायाय
कै रायदु तायदु मी थाय डे कै
दुरु लायाय लैदै लायाय लैदै
— लायाय लैदै लैदै लायाय लैदै

नेपाले धार्मिक सहिष्णुता

श्री कविरत्न सिद्धिचरण

प्रकृति लिसे, मनू लिसे व
थः लिसे नं मनूया संघर्ष जुया
च्वंगु दु । प्रकृति नापयागु संघर्ष
भौतिक विज्ञान व कला कौशलं
मनूनसैं त्याक्ययु स्वइ, मनू
लिसेयागु संघर्ष राजनीति व युद्धं
अथ्य हे थः लिसेयागु संघर्ष धर्मं
त्याक्ययु प्रयत्न जुया च्वन ।
विभिन्न समाज तथा जाति
विभिन्न धर्मयात ग्रहण याना
थं संघर्षयात त्याक्ययु स्वया
च्वंगु दु, गुकियात सत्य अर्थात्
भगवान् नापलाय्यु मार्ग नं धाइ ।

भगवान् वा सत्ययात नाप लाय्युया निति गुणु छगू हे मार्ग
जक अनिवार्य धयागु नं मदु श्रद्धा व लगन पूर्वक जन
जीवनयागु सेवाय् तत्पर जुल धाःसा थःगु जीवन संसारे
स्नेह व सौन्दर्यया साम्राज्य स्थापित याय्युया लागी उत्सर्ग
यात धाःसा न्व्यागु हे रूपे थजु भगवान्यागु पूजा याःसा
वयात भगवान् वा सत्य अवश्य दर्शन लाइ । भी आजु
तापाः आजुपिसं थं तथ्ययात महसीका मानव जातिया
न्व्योने थुकियात तया थकल । वैदिक काले हे थुगु खँया
घोषणा जुइ धुकुगु खः । गथ्य फुक खुसिचा बना समुद्रे
मिले जू वनि अय् हे विभिन्न धर्म नं मनूतयूत भगवानया
याय् थंकइ धका महाभारते धया तःगु दु । अय् जुया नं
विद्वाननसैं धर्मयात विभिन्न प्रकारं वर्णन याना तःगु दु । अय्
हे जूगुलि वास्तवे संसारे दक धर्मयागु मूल छगू जुया नं
विभिन्न धर्मत्रिलम्बीपिनिगु त्वापुं इतिहासयागु पन्ना हाकुका
बुल्का तःगु दु । ता दुगु खँ मखुनि हिन्दू व मुसुमांतयगु
त्वापुं हिन्दुस्ताने हि बाः वयकुगु बांमलागु घटना नं भीसं
खना । अन जक्क मखु मेमेगु थासे थथ्य जुया वंगु घटना
विश्वयागु इतिहासं भीत क्यना च्वंगु दु । हिन्दू धर्मयागु
हे छगू मूल शाखा बौद्ध धर्म खः धाइ । थं धर्म विश्व



व्यापी जुजुं बना च्वंगु दु । भीगु थं देश बौद्ध धर्मया
उत्पत्ति स्थान खः । धर्मयागु कट्टरता छगू भारी दोष खः ।
थं कट्टरतां मभिगु परिणाम हइगुया निति भी आजु तापा
आज्जुपिसं न्हापांनिसैं थं निगू धर्मयात सामज्जस्य छगू स्वस्थ
विचारया प्रवाह न्व्याकेगु प्रयत्न याना वया च्वंगु दु । थं
लेखया अभिप्राय व हे नेपाले प्रचलित निता धर्मयागु साम-
ज्जस्यता क्यना अपि गय् नाप नापं प्रवाहित जुया च्वन
क्यनेगु खः ।

आदिवासीपिन्त त्याका आर्यत भारते वल । विजयी
जाति वर्ण दयका च्वय च्वय्यागु वर्णे जक थःपि च्वना परा-
जित जातियात कत्यला शुद्र आदि धका दासयागु श्रेणी
नं तल । थथ्य वर्ण जाति मानवया मौलिक अधिकार
नं हनन जुइक धर्मया स्तम्भ थंगुलि थं धर्म आपासित बाधा
उत्पन्न जुल । धर्मया कट्टरपंथीपिसं पिकाःगु थं हे अस-
मानतां विक्षुब्ध जुया कपिलवस्तुया छम्ह युवकं उपाय माल ।
जन्मं सुं तःधं चीधं मखु कमं जक तःधं चीधं जूवनि धका
चेतनायागु छगू लहर वं पितइल । बुद्धया जीवन काले हे
थं धर्म नेपाले प्रचार याय्यु प्रयत्न जुल, तर वसपोलया
प्रधान शिष्य आनन्द भिक्षुं अन ला न्हापांनिसैं थं धर्म

प्रचार जुया च्वंगु दु धका लिसः बिल धयागु खँ दु । धापूया सारांश थव हे जुइमाः कि थनयागु (नेपालयागु) प्रचलित धर्में याय् माःगु सुधार छु मदु, न्हापांनिसें थन परिशुद्ध धर्मयागु प्रचार जुया च्वंगु दु ।

थ देशे ८० प्रतिशतं मयाक आदिवासीपिनिगु हे आवादी दु । थन तःगू शताब्दि तक शासनयाःपिं गोप वंश किरात वंश आदिवासी हे खः । लिपा भारतं वःपिं लिच्छवी व मल्लतसें थुकी शासन यात । हानं भिष्यंगूगु शताब्दी हिन्दु धर्मया पक्षपाती जुजु जयस्थिति मल्लं थन नं भारते थें प्यंगू वर्ण व विभिन्न जातयागु सृष्टि याना भारत लिसेयागु सम्बन्धयात क्वातुकल । वरन् नेपालया पिने वा दुनेयागु न्हागुयात थः नाला छ्वयूगु खूबिं याना थव चतुर्वर्ण व जातया वन्देज छ्वासुसुं वन । बौद्ध धर्में जातयागु विमेद मदय् माःगु खः, परन्तु उक्त जुजुं पेशायागु त्वाखं थुकी नं जातयागु पःखाः थना बिल । थर्थ्य जुया थनयागु बौद्ध धर्में नं जात प्रथा गुगुं रूपं प्रचलित जुजुं निता धर्म त्वाक ज्याज्यां वन । जातभेद व कर्मकाण्डया विरोधे खडा जूगु धर्में जातभेदयागु कचिंगः च्वंबल । तर थुकी छगू फायदा नं जूवंगु दु, थर्थ्य जातभेद दुगुलिं नं हिन्दू धर्मयागु संसर्गे हिन्दू धर्मविलम्बी जुजुपिनिगु शासने नं नां जक जूसां थव धर्म त्यने फुगुया छगू कारण जू वन । लिपा जुजु पृथ्वीनारायण शाहयागु समये नेपाःयात हिन्दू राज्य यायूगु प्रयत्न जूबले नं हिन्दू धर्म लिसे थुकियागु समानतां याना थव धर्म त्यना च्वन । याःयाःथें जुइगु, रबर थें प्यानुगु जूगुलिं थव धर्म मदया मवं । तिब्बत पाख्यं नं धर्में प्रभाव परे जूवःगुलिं अनयागु हवापानी लानय् ज्यूगु आदि सुगमतां याना थव धर्म मदया वन्य मफुत ।

हिन्दुस्ताने भिनिसः दँ तक बौद्ध धर्म व बौद्ध साम्राज्य विस्तार जुजु वन । गुप्त समय अर्थात् ख्रिष्टाब्दीया स्वसः दँ हिन्दुस्ताने थव निगू धर्मयागु बांमलागु संघर्ष जुल । कट्टर-पन्थीपिसं जिभिगु धर्म हे जक धर्म धयाथें मेगु धर्मयात दवे यायूगु स्वत । परन्तु नेपाले निगू धर्म नं छगू हे थें जुया त्वापु ख्यापु मदयक च्वना च्वन । संबत् ३८६ अंकित चंगुया अभिलेखे प्रसिद्ध जुजु मानदेव नारायणया तुतः दयका थःगु उदारता क्यंगु दु । बौद्धमार्गी नारांयोया पूजा याय् मज्यू धयागु थन मदु । हानं बुद्ध भगवानयात छम्ह हिन्दू धर्मविलम्बी नं उत्तिकं श्रद्धा व मान तःगु दृष्टान्त थन आपालं दु । थनयाम्ह सुप्रसिद्ध पशुपति महायोयात कार्तिक

शुक्रे अष्टमी खुनु बुद्ध भगवानया सुकूट पुइका पूजा याइगु चलन आः नं दिन । गुकिं याना व अष्टमीया नां हे ‘मुखः अष्टमी’ जुया च्वन । अर्थ्य हे थनयापिं प्रसिद्ध शिवलिंग आदिश्वर, मणिलिंगेश्वर, गोकर्णेश्वर आदिपिं थाय् द्वलद्वः बौद्धपिं वना समय समये अष्टवीतराग धका पूजा आजा याना च्वंगु दु । गणेश्वो, भैलेश्वो, भिंश्वो, पीठ, देवी आदि जा थन निगुलिं धर्मयापिनि मंका हे जुल । स्वयंभू पुराणे छथाय् स्वयम्भूया स्तुतिया क्रमे थर्थ्य नं धया तःगु दु :—

नमः स्वयम्भुवे नित्यं ज्योति रूपायः ते नमः ॥

येन येन हि भावेन तेन तेन हि रूपिने ।

ब्रम्हाणां ब्रह्म रूपाय वैष्णवाणां च वैष्णवे ॥

शैवाणां शिव रूपाय इन्द्राणां इन्द्र रूपिने ।

आदि भावनायागु रूपम्ह धका प्रार्थना याना तःगु दु ।

खतु श्री मद् भगवत गीताय् नं ‘यं यथा मां प्रपद्यन्ते त तथैव भजा म्यहं’ आदि धका घोषणा याना तःगु दु ।

परन्तु व कृष्णया भक्त धका थःपिन्त धाइपिसं थःगु हे जातीया छगू प्रधान अंशयात नं थः आराध्यदेव कृष्णयागु मन्दिरे तक दुहाँ वयूगु अधिकार मविसे कवःवुद्धि पिकया च्वंगु नं भीसं खना हे च्वना, हानं ‘हस्तिनां ताज्यमानेपि नगच्छे जिन मन्दिरं’ धका निषेध याना तःगु नं भीसं खना हे च्वना । तर भीगु प्राचीन देश नेपालं मन्दिर प्रवेश यायूगु अधिकारं सुयातं वंचित याना तःगु खने मदु । पीठ देवता-

पिनिगु गुलिखे मन्दिरे पालाः हे लःचले मजूपित याना, हानं बुंगदो, जनबाहादो, नालोया करुणामय आदियात

विशेष पर्वदिने दक्ले न्हापा लाक व हे लःचले मजूपि विशेष जातिया पूजा कया अज्ज सकोया वज्रजोगिनीयें ज्यागु थासे व हे लःचले मजूपिसं मन्दिरे थाहाँ वना म्हासुख्वाःमाजु

भागि याय् दयका थःगु जातीयागु महान् उदारता क्यना तःगु दु । विभिन्न रूप जुया नं ईश्वर धयाम्ह छम्ह हे खः धयागु दार्शनिक विचारयात नं व्यवहारे हया उगु हे प्रकारं व्यवहृत यायूगु कमगु खँ मखु । थव उच्च विचारं पोख्ल जुइ धुंकुगु महान् जातीं जक याय् फुगु खँ खः । थन कान्तिपुरे नरले च्वंगु न्यागूगु शताब्दियागु छगू शिलालेख अनुसार कृष्ण द्वैपायनयागु सिद्धान्त कया बौद्ध-धर्मयात आक्रमणयागु छथाय् खन्य दु । नाप नापं अनयाम्ह जुजु मानविहार स्थापना याना बौद्ध धर्मयागु सन्मान याःगु नं खन्य दु । थन छखाँहे हे सुं बौद्ध सुं हिन्दू जुइ फु । बौद्ध मार्गी व हिन्दूपिनि

[ल्यंगु ४६६ पृष्ठे]

[श्री वैकुण्ठप्रसाद जुया ५० दं क्यंगु जन्मनि खुन्हु]



श्री वैकुण्ठप्रसाद लाकौल

न्येदं क्यंम्ह उम्ह मास्टर, भाय्-च्यो,
न्येदं मेगु अभ म्वाइम्ह जुलं द्यो।

निगल मिखाय्-सं, सुलचं छाय्-पाः,
गःपः स्वत्तिक, कोटं ची (फी) म्ह।
ताहा तुति निपु, फिति फिति संका,
धाःथाय् धाय्-वं, खन्यदः वैम्ह॥

न्येदं क्यंम्ह उम्ह मास्टर भाय्-च्यो
न्येदं मेगु अभ म्वाइम्ह जुलं द्यो।

तपुलि निधारे भवस्त्रू वः सां,
सिन्हः छफुतिसां, कपूले वैम्ह।

मुयू जुया मखु, अय्-सां गवाय् गी,
मर्का कल्यां श्वीका खाइम्ह॥
न्येदं क्यंम्ह उम्ह, मास्टर भाय्-च्यो,
न्येदं मेगु अभ, म्वाइम्ह जुलं द्यो।
माँ भाय् अथवा, कविता धाय्-वं,
खनी मखुत वं, न्ह्योन्य लकां नं।
मंचे अथवा, उख्य थुख्य मुंथाय्,
खेंकथि हीका, म्वीका हैम्ह॥
न्येदं क्यंम्ह उम्ह, मास्टर भाय्-च्यो,
न्ये दं मेगु अभ, म्वाइम्ह जुलं द्यो।
निभाःथी बले, कुसां कवीम्ह हँ,
हूं स्वामी उम्ह—‘परम भक्त हँ’
सरकारे उम्ह डाइरेक्टर हँ,
धाय्-लो बरु धा, नंभरि भाय्-ह्यो॥
न्येदं क्यंम्ह, मास्टर भाय्-च्यो,
न्येदं मेगु अभ, म्वाइम्ह जुलं द्यो।
चैम्ह जि मखुसां, नय् फुम्ह भाःपाः,
‘जन्मनि खुनु वा’ धका ब्वनीम्ह।
‘फय्-गं मखु थुगु सगं’ धका धाय्,
“खय्-फु” धका ल्हाः फैम्ह व तांज्यो॥
न्येदं क्यंम्ह उम्ह, मास्टर भाय्-च्यो,
न्येदं मेगु अभ, म्वाइम्ह जुलं द्यो।
—सगं व्यूम्ह श्री कैलाशराम

मापण

[यलया २,५०० गृगु जयन्तीया प्रसंगे जूगु प्रथम बौद्ध सम्मेलने न्यंका दीगु ।]
साहित्यशिरोमणि चित्तधर 'हृदय'

भागियाय् कच्छुनाः न्हापां जिमि तःदाजुयात निं,
वयागु धर्मया नापं शीलवान् संघयात नं !


इनेबहःम्ह सभा नायोजु व विश्वबन्धुपि,

थव 'नेपाल'या सः खः—

थौयागु जगते 'बुद्धधर्म'या छु स्थान दु व खँ धया
च्वने माःगु मखु । थव अशान्त जगते शान्तिया गुगुं लँ
दःसा व खः नेपाल-पुत्र बुद्धं कना बिज्याःगु लँ । व लँ नं
निर्वाण प्राप्ति यायत् जक लोगु मखु थव भूमण्डले च्वनाः
आनन्द पूर्वक जीवन इनेत नं उलि हे ज्याय् ख्यले दु ।

खः भौगोलिक दृष्टि नेपालः चीधं, जनसंख्या नं आपाः
मदु, अज राजनैतिक व वैज्ञानिक दृष्टि ला आपाः हे लिपा
लाना च्वंगु दु; तर सभ्यता व संस्कृतिया दृष्टि जक मखु
मानवताया दृष्टि अज विश्व बन्धुताया दृष्टि प्राचीन कालंनिसैं
हे थव नेपालः-दे च्वन्ध्याः । गुगु बखते नेपालः-गाः लखं तोपुयाः
नागवास जुया च्वन तिनि, मनूतय् वास पर्वते उखें थुखें
चिच्चाः दना च्वन तिनि उगु बखते नं थनया बासिन्दातयके
व विश्वबन्धुत्वया भाव गाक जाया च्वंगु दु, पृथ्वीया न्ह्यागु
भागयापि मनूत ज्वीमा, अपि नाप लात धायव अपि नाप
दाजु किजा थें व्यवहार याय् धुकइ । अज दँ-बँ च्वन
धायव ला थःथिति यानाः थः थःपिनि समाजे दुथ्याकाः
नागरिक नं याय् धुकइ । थज्याःगु खभावपि मनूतय् थाय्
गन न्यागू रंग न्यागू भूत व न्यागू ज्ञान आदिया एकताया
प्रतीक पञ्चबुद्धात्मक ज्योतिरूप स्वयंभूया आविर्भाव जुल
अले जा थनया जनताय् व मानव मात्र दाजु किजा खनेगु
भाव भं हे बृद्धि जुल । फलतः गन महाचीनं फूसां (मज्जुश्री)
वयाः व पुखूया लः छवनाः देश दयुका बिल, स्वयंभू दर्शन
यायत् चतुर्दिंगं अनेक जन वल, अले व वक्त फुकसितं नेपालः
देया नागरिक यानाः नेपाल धर्मे दीक्षित यानाः 'नेपाल' हे
याना काल । गुकिया प्रमाण इतिहासया पौ व नेपालया
जीवित जाति दहे दनि ।

व हे विशेष गुणया धुकू जुया च्वंम्ह, 'पर्सि प्यक्वे वन,
च्वापु मत् दुम्ह, कोशी-गंडक गाचो ब्वःम्ह' नेपालः मामं थनि



२,५०० दँ न्ह्यो थ हे पुन्ही खुनु छम्ह काय् च्वीकल ।
थव खनाः सुमन-सौरभ न्ह्याः वयाः श्री हया च्वंगु लुम्बिनीया
भंगः पक्षीं जगतयात थव भिंगु सः न्यंका च्वन, नाप नाप
सिमा व स्वांमां नं मद्विक स्वांवा गाका च्वन । गुकिं यानाः
थव पुन्हीया नां हे 'स्वांयाःपुन्ही' जुल । अथे हे वसपोल
नेपाल-पुत्र सिद्धार्थ २९ दँया ल्यायम्ह वयसे गृह त्याग
यानाः व हे थःगु स्वामाविक विश्वबन्धव-नेपाल-धर्मयात
अज विशेष रूपं थ्रीकाः (बोध जुयाः) बुद्ध जुया बिज्यात,
थव हे दिने ।

थज्याःगु लुम्बिनी व व हे लुम्बिनी जन्म जुयाः बुद्ध
ज्ञम्ह गौतमया विषये थौं कन्हे गुलिं गुलिं विद्वान्पिनिगु
वस्तुस्थिति बालाक मथूगु अनेक खँ तायदु, गुगु संसार हे
ब्रह्मा जुयाः याय् माःगु थव बुद्धया २,५०० दँगु जयन्तीया
बखते ल्वःगु धाय् मज्यू ।

ध्राय हे महाइपुसे च्वंगु ख॑ उखुनु तिनि श्री लंकां नेपा: बिज्याना च्वंम्ह नारद महास्थविर, गुम्हसित नेपालं ८९ दृं न्ध्यवनिसे महस्य॑, गुम्हसित अबले यतखा बाहाले १०१२ दो मनू मुनाः अभिनन्दन याना, वसपोलं थुगुसी आनन्द कुटिया छग॑ स्वागत समारोहे धया बिज्यात—“भगवान् बुद्ध नेपाली मखुसां नेपाल व भारतया सिमानाय् जन्म जूम्ह खः” हानं ख नं धया बिज्यात—“वसपोल बुद्ध आर्य जूगुलि, नेपाली मखु धयागु खः”। अथे हे वसपोलया लंकाया प्रधान मन्त्री भारतया प्रधान मन्त्रीयात छवगा हयादीगु सन्देशे धया तःगु दु “लंका जक मखु दक्षिण एशिया व दक्षिण पूर्वी एशियाया फुक देशं बुद्ध थैं जाम्ह महात्मा संसारयात बिउगुली भारतयात बढाइ बिइ”। हानं भारतया उप राष्ट्रपति डा० राधाकृष्णनजुं का. न. पा.या नागरिक स्वागत समितिया समारोहे धया दिल—“प्राचीनताया जक गौरव यानां विश्वे छुं ज्या ज्वी मखु, थःपिसं हे छुं ज्या यायमाः, भगवान् बुद्ध नं नेपाले जन्म जुयाः तःधं जूगु मखु, थःगु हे पुरुषाथं तःधं जूगु खः”। अथय हे भारत लिथ्यंका बुद्धजयन्तिया उपलक्षे नं थथ्य लयताया दिल—“भारत भूमी महात्मा बुद्धया जन्म जूगुली भारतवासीयात साप हे लयता वः”। हानं लाओसया प्रधान मन्त्रीया सन्देशे धया तःगु दु—“जिमिगु हृदय भारतया व भूमी छिकिपि नाप दु गन महात्मा बुद्धया जन्म जुल”। मेगु बर्माया राष्ट्रपति भारतया राष्ट्रपतियात छवया हःगु संदेशे धाःगु दु—“जिपि बौद्धपिसं महात्मा बुद्धयात भारतया दक्ले तःधीम्ह सपूत माने याना”। महापण्डित राहुल सांकुल्यायन जुं थःगु छग॑ लेखया अन्ते धयादिल—“थुकथं भारतया सर्वकालया सर्व श्रेष्ठ पुत्रं थःगु जीवनया अन्तिम वर्ष समाप्त याना बिज्यात”।

छु, थव फुक खं नेपालया सार्वभौम सत्ताय् व नेपालया जातीयताय् आधात् मलाला? छु, धात्यैं वसपोल भगवानया पञ्चशीलया व्याख्या थव हे ला? थव ला खास यानाः सदी सदी निसे एकतन्त्रं त्येकाः द्यना च्वंगु नेपालीतयगु राष्ट्रीय भावना व जातीयतायात कुचुकुचु नकाः थं वःगु खः, थुकी छुं सन्देह मदु।

आः जिमि न्ध्याबलैं लुमंके बहःम्ह जुजु त्रिभुवनया त्याग व तपस्यां थना थकुगु जिमि योम्ह जुजु महेन्द्रं कघाना तःगु नेपा: दे यू. एन. ओ या मेम्बर ज्वी धुकल, थथ्य छम्ह निम्ह विद्वान्तरसे धायवं व हे खं खः धका मिखा तिसिनाः पत्याः ज्वीगु जमाना वने धुकल। उकीसनं जिमि तःधीदाजु

बुद्धं नं जिमित थव हे अंशा बिया थकुगु दु ‘सुं तःधं मनू वा तःधं सफुलिं धाल धायवं व खँयात थःगु स्वतन्त्र विचारं मखंकं खः धका विश्वास याय् माःगु मदु’। उकिं वर्तमान नेपालं व खँयात थुकथं विचाः याइ—

‘बुद्धया जन्म भारतया सिमानाय्’ धयागु, ‘भारत भूमी महात्मा बुद्धया जन्म जूगुली’ धयागु, ‘बुद्धयात भारतयात दक्ले तःधीम्ह सपूत भाःपा’ धयागु व ‘भारतया सर्वकालया सर्व श्रेष्ठ पुत्रं’ धयागु इत्यादि खं विश्वया मिखाय् धुलं छवाका लुम्बिनी हस्तक्षेप यानाः बुद्धया अवशेष फुककं पचे यायत्र व्रयाकेत स्वःगु प्रत्यक्ष खने दु।

हानं ‘बुद्ध आर्य जूगुलि नेपाली मखु’ धयागु खं मंगोल, आर्य व किरात छपाँय् जुया च्वंगु नेपाले आर्य अनार्यया प्रश्न पिकयाः थःत आर्य भाःपा च्वंपिन्त फायाः राष्ट्रे कलह पिहाँ वयकेगु म्वसाः खने दु, हानं बुद्ध धात्यैं आर्य हे खःला? थुकी नं ला विद्वान्पिनि मत भेद दनि—‘बुद्ध मिश्रित किरात अर्थात् इण्डो मंगोलया सन्तान खः’ धका धया हे च्वन निति सा गथे बुद्ध आर्य ज्वी। खः भिंगु ज्या यानाः आर्य ज्वीगु जूसा वस्पोलयात आर्य धायफु, नेपालीतरसे नं जा भिंगु ज्या यायफु, याना हे च्वंगु दु।

उकीसनं ‘बुद्ध भगवान नेपाले जन्म जुयाः बुद्ध जूगु मखु,’ धयागु खं नं नेपाःयात, बुद्धया जन्मभूमि नेपाःयात कथि थुनेगु प्रयास खः। थव खं सकसिनं स्य॒ गुम्हं प्राणी व स्वामा सिमायात नं वृद्धि ज्वीत देश, काल व परिस्थिति ल्वयकेगु अत्यन्त आवश्यक। गुंगु चिकुगु थाय्यापि प्राणी गुंगु तांन्वोगु थायया जीव शालाय् तय् माल धाःसा गुलि जल याना नं म्वाके थाकु, अथय हे गुंगु तांन्वो थाय्या सिसाबुसा मा चिकुगु थासे म्वाकेत गुलि जल याय् माः, अजज सिसयके ला भन हे थाकु। धात्यैं धाय् धाःसा महात्मा गान्धी पराधीन भारतया काठियावादे जन्म मजुसे विलायतया गुंगु लड्डतय् कुले जन्म जूगुसा महात्मा गान्धी महात्मा गान्धी मजुसे मिष्ठर अमुक ज्वीगु ज्वी, अथय हे बुकटि वासिंगटन नं दलित हब्स जाती जन्म मजूगु जूसा अपाय्चो नां दनिगु खइ मखु। हानं भीसं खं हे खन हिमाल गयगु ज्याय् विशेष यानाः चिकुगु मुलुक यापि च्वापुह मिहता च्वंपिं जक गय् फइगु, उकिं नेपाः सत्तीगु हिमाल गयत नेपाली स्यार्पातयगु सहायता मकासे हे मगाः। यदि तेनजिङ्ग दाजु मदुगु जूसा व अजेय नाग पर्वत (माउंट एमेरेष्ट) अजेय हे जुइगु। अथय हे पार्वतीयाके पवित्रता दुगु,

सीतायाके सहनशीलता दुगु, अंशुबर्मियाके उदारता दुगु व सिद्धार्थयाके बुद्धत्व दःवःगु नं नेपाले जन्म जूगुलि खः मेथाय् जन्म जूगु जूसा सिद्धार्थ बुद्ध जुइगु हे मखु । थव खँ ललित विस्तर व जातक आदि बौद्ध ग्रन्थे बुद्धं जन्म ज्वो न्हो तुषिता भुवने च्वनाः ‘गन, गुगु थासे जन्म का सा जि बुद्धत्व प्राप्त याय् फइ’ धका विचाः यान धाःगुलि सी दु । हानं थव नेपाल भूमि शाक्यमुनि तोताः मंपि क्रुच्छ्रन्द, कनकमुनि आदि बुद्धपिनिगु नं जन्मस्थान खः, थव खँ फाहीयान आदि यात्रीपिनि धापुलि सी दु ।

हानं अल इण्डिया रेडियोलं संसार भरे माने याना च्वंगु थव २५०० दँया बुद्ध जयंति समारोहया समाचार व्यूगुली नं नेपाःयागु नां तक नं मकासे ‘हिमालय प्रदेशया राजकुमार गौतम बुद्धया जन्म स्थल लुम्बिनी क्रूगु न्हूगु तीर्थस्थान जुया च्वन’ धका थःगु नेपाल प्रति बांमलाःगु मनोभाव क्यना च्वन । लुम्बिनी न्हूगु तीर्थस्थान मखु पुलांगु तीर्थस्थान खः, बुद्धगया, सारनाथ व कुशीनगर स्थायाः नं पुलांगु, अशोक महाराजया तीर्थ स्थान, अनेक देशं वःपि बौद्धयात्री-पिनि तीर्थ स्थान व जिमि थुको जुजुया श्रद्धा स्थल खः थव लुम्बिनी ।

विश्व बन्धुपिं, नेपालया छिकिपिके इनाप थव हे कि तःथं देशया तःथं मनुखं धाय् व खँ ख हे खः धका विश्वास याय् माःगु छु खँ मदु । भगवान बुद्धं आज्ञा जुया बिज्ञाः थैं छिकिपिसं क्रको नेपालया माय् प स्वयादिसँ, हानं नेपालया इतिहास क्रको नं पुइका दिसँ, प्राचीन नेपाल गुलि गथे चक्कना बने धुकुगु दु । अले बुद्ध धयामह सु, लुम्बिनी धयागु गन बांलक सी ।

हानं छिकिपिके इनाप थव नं याय् कि थव प्रजातन्त्रया ज्ञानाय् बुद्ध भगवान्या ‘पञ्चशील’या मेगु रूप ‘पञ्चशीला’या

आधारे छगू देशं मेगु देश नाप व्यवहार याय् माःगु ज्ञानाय् नेपाःया ख्वःसः मखु न्याय युक्त अपील न्यना दिसँ जगते शान्तिया बय् पूम्ह बुद्ध नेपाल-पुत्र खः, बुद्धया जन्मभूमि लुम्बिनी नेपाल राज्यया दुने थ्यंक लाः । हानं थव नं लुम्का दिसँ नेपालं थःगु जक उचित माँग पेश याइगु मखु सुयाते अन्न्याः जुल, खन कि उकिया विरोध व व अन्न्याः जम्हसित ग्वाहालि नं याइ, उक तिब्बते बौद्धधर्म प्रचार यानाः लिहाँ वःम्ह पं सुनय श्री मिश्रयात भारतं दुत मकोःबले नेपाल अशरण शरण नेपालं नेपाले तयाः नेपालया नागरिक यानाः तयातल, गुकिया प्रमाण यलया यम्पि विहारे द हे दनि । अथ्य हे भारतं ख्यानाः पितिना हःपि गुलिखे बौद्धपिन्त नं नेपालं थःगु विश्वबन्धुत्वे दुर्ध्याकाः ‘नेपाल’ याना क्यातःगु नं इतिहासं कना हे च्वंगु दनि । हानं नेपालया क्रम्ह बौद्ध विद्वान् श्री धर्मादित्य धर्मचार्य “भारते जन्म जूपि अर्हतपिनिगु अस्थि धातु भारते हे हय मा:” धका ३० दँति न्हो आवाज पिकाय् धुकुगु व आः हाले हे तिनि व अग्रश्रावक अस्थि इंगलैण्डं भारत लित हयाः साँची तल । अथे हे नेपाल-पुत्र भगवान् बुद्धया अस्थि धातु व दन्त धातु आदि अवशेष नं नेपाले हयगु नेपालया न्याय संगत माँग अन्तर राष्ट्रीय न्यायालये थ्यन धाःसा छिकिपिसं न्याय याना दी मानि, गुकिं यानाः वस्पोल नेपाल-पुत्र भगवान् बुद्धया व शान्तिया लँ सार्थक ज्वी । बन्धुपिं, थव खँ लुम्का तया दिसँ ! ‘सत्यया जय ज्वी लोके’ धाःगु खँ सत्य हे तिनि, नेपाःया सत्य खँय् नं ला अवश्य विश्व पाच्चनि ।

जय नेपाल पुत्र बुद्धया नीन्यासःदँगु तिथि !
ने. सं. १०७६ स्वांयाःपुन्ही

—चित्तधर ‘हृदय’

[४६२ पृष्ठ्या त्यँ]

परस्पर काल बिल याय् ज्यूपि नं आपालं दु । हानं गुलिखे कर्म काण्डत नं गुलि बौद्ध धर्मया अनुसार गुलि हिन्दू धर्मया अनुसार याइगु छ्यँ दु । धात्ये धाय् माल धाःसा थन बौद्ध व हिन्दया प्रश्न हे मदु । उकिं धर्मयागु नामे कलह भेद पिकया थःथवे छ्यै तच्छ्याना च्वंपिसं भी प्राचीन नेपाल पाखे स्यनेगु आपालं खँ दु ।

२,५०० दृं क्यंगु स्वांया-पुन्ही समारोह

नेपाल : भारत : पाकिस्तान : लंका : बर्मा : जापान : चीन : सोवियत रूस :
वियतनाम : सिंगापुर, चेकोस्लोवाकिया : जर्मन : इंगलैंड : स्वीडेन आदि
एशियाई तथा पाश्चात्य देशे धुमधाम माने यात ।

नेपाले

लुम्बिनी, यें, यल, खप, भोट, सांगु, तानसेन, बागलुंग, बुटवल,
बलम्बु, भोजपुर, चैनपुर, पोखरा, बीरगंज आदि थासे

भारते

बुद्धगया, सारनाथ, कुशीनगर, दिल्ली, कलकत्ता, बर्बई,
मद्रास, हैदराबाद, सिक्किम, कालिम्पोंग आदि थासे

लुम्बिनी

२,५८० दृं न्हापा थःगु अंचले जन्म जूह्म सिद्धार्थया
जन्म दिं, वसपोलया बुद्धत्व प्राप्तिया २,५४५ दृं न्हापाया
संस्मरण दिं, महापरिनिर्वाणया २,५०० दृं क्यंगु तिथिया
लुम्बिनीं जयन्ती व महोत्सव याना श्रद्धाञ्जलि अर्पण यात ।
सुथ न्हापां स्थानीय लुम्बिनी बुद्ध विद्यालयया छात्रपिनिगु
पाखे प्रभात फेरि जुल, गुकी यातायात मंत्री श्री पशुपति
घोष व सरकारी कर्मचारीपि एवं गण्यमान्य व्यक्तिपि नं
सम्मिलित जूगु दु । अले प्राचीन महामाया देवीया व बुद्ध
मंदिरया भगवान बुद्धया प्रातःकालीन पूजा श्रद्धानत उल्लासपूर्ण
हृदयं द्वलंद्र नरनारीपिसं यात । न्हिने स्वां ध्वजा आदि
शृंगार याना तःगु ११३३ तुयूपि द्वहृतयेसं सायेका तःगु रथे
बुद्धया मूर्ति तया जुल्स यात । गुकी लुम्बिनीया जिर्णोद्धार
व पुनर्निर्माणया सिलसिलाय् वया च्वंपि ज्यामितयेसं थःथःगु
बाजा व संगीतं बुद्धया जुल्स सभक्षयेक सम्मान प्रकट
यात । अले जुल्सया विनीत परन्तु गर्वित स्वरं बुद्धजयन्ती
जिन्दावाद, बुद्धको जय होस, अज्ञानको नाश होस् नारां
लुम्बिनी थ्वया च्वन । ४ बजेती जुल्स सभाया रूपे परिणत

जुल । सभाय् नवावां धर्मोदय सभाया सभापति भिक्षु
अमृतानन्द स्थविरं लुम्बिनीया महिमा व बुद्धया उपदेशं
मनूयात बीगु प्रेरणा विषये व्याख्या याना बिज्यात । तदन्तर
श्री ज्वा. से. वेदप्रसाद लोहनीं लुम्बिनी निर्माण कार्यया
रूप रेखा न्यंका दिल । सभाया मेमेपि विशेष वक्तापि मध्ये
श्री काशीप्रसाद, श्री वास्तव, भैरववाया बड़ाहाकिम,
तौलिहवाया बड़ाहाकिमपिनिगु नां उल्लेखनीय जू । अन्ते
सभापति आसनं दना यातायात मंत्री श्री पशुपतिघोषं सार-
गम्भित भाषण याये सिध्येका सभा विसर्जन जुल । समाचारे
धया तःगु दु, थ्व स्वांया-पुन्ही माने यायेया निति देश
विदेशया व्यक्तिपि व रिपोर्टस्त नं उपस्थित जूगु दु ।
उपस्थित जूपि भारतीय गण्यमान्यपि मध्ये उत्तर प्रदेशया
डिपुटी मिनिष्टर श्री जगतप्रसादजुया नां न्हथने बह जू ।
थ्व नं स्मरणीय जू, वंगु छु दृं निसें धर्मोदय सभां व लुम्बिनी
धर्मोदय समिति थ्व स्वांया-पुन्ही लुम्बिनी माने याना वया
च्वंगु खः, थुगुसी जक विशेष प्रकारं माने यायेगु निति सर-
कारं माने याना च्वंगु इर्षया खँ खः ।

२,५०० ग्रू जयन्ती विश्वया अनेक बौद्ध-अबौद्ध देशाया विभिन्न राजधानीं माने याथे भी राजधानीं यें न धुमधाम निन्हु तक स्वांया-पुन्ही माने यात । स्वांया-पुन्ही कन्हु न्ह्यो सन्ध्याइले आनन्दकुटी स्थित श्री लंकाराम चैत्यया गर्भे चंगु तथागतया अस्तिधातु न्यचपाचो तक खते तया जुलूस याना हल । अनं निसें थुखे प्यम्ह सलं सायेका तःगु सुसजित वग्गीले तया न्हेकंतला, असं, वंगः, जुद्दसङ्क जुका तिनि-ख्यले डायसे बिज्याकल । जुल्से द्वलंद्व धुं-धुपांय ज्वना 'इतिपी सो ...' आदि बुद्ध वन्दना पाठ याना वःपि नर-नारीपि बाहिक तुतः न्वना, भजन याना, धार्मिक व वैष्ण बाजा थाना वःपि नं यक्वं दु । अस्तिधातु डायसे बिज्याकेवं धातुया दर्शन सर्वसाधारण जनतायात क्रमशः सुव्यवस्थित रूपं बिल, थ्व दर्शने कन्हे खुनु अर्थात् स्वांया-पुन्ही खुनु सुथ-वंक्षि तकं याः वइ चंपि दर्शकतयेगु भीड़ जुयाच्चवन । स्वांया-पुन्ही खुनु प्रातःकालं निसें प्रभात फेरि आनन्दकुटी विद्यापीठया छात्रपिसं देचाहिला यात । निह्ने अखिल नेपाल भिक्षु महासंघया सभापति भिक्षु प्रज्ञानन्द महास्थविरया सभापतित्वे तिनिख्यले डायसे तुं क्रगू आमसभा जुल ।

श्री ५ महाराजाधिराज्या सन्देश

थौंयागु दिं भी मानवजातियात गन तक महत्वपूर्ण जूंजि धया च्वने माःगु खँ मखु । थौं श्री भगवान बुद्धयागु अहिंसात्मक शान्ति सन्देश तथा उपदेश प्रातः स्मरण जुइगु स्वाभाविक है खः । तथागतं क्यना बिज्यागु शान्तिया लँपु थौंया अणुशक्तिया युगे वैज्ञानिक तथा व्यावहारिक ढंगं मानवजातिया न्ह्योने स्पष्ट रूपं खंकेगु भीगु निंति क्रगू महत्वपूर्णगू खँ खः । तथागतया पञ्चशील थौं भीसं 'पञ्चशील'या रूपे क्या च्वना । भगवान बुद्धं बिया बिज्यागु अहिंसा, सहयोग, कर्मशीलता, मैत्री भावनाया विशुद्ध शिक्षा दीक्षां है जक थौंया संसारयात अकुशल लें लाइगुलिं बचे याये फह धायेगुली अत्युक्ति मजू । जिगु थ्व हे आन्तरिक कामना दु कि भगवान बुद्धया उपदेशं सदा सकसिगुं मनयात सुप्रभातया प्रकाश बिया देश व देशवासीपिनिगु कल्याण वृद्धि जुयेमा ।

जय नेपाल ।

सभाय माननीय प्रधान मन्त्री श्री टंकप्रसाद आचार्य स्वांया-पुन्हीया स्वंगू महा घटनाया विषये धाये धुंका धका बिज्यात, 'भीगु निंति थ्व दिनं विशेष महत्व व्यू, कारण

भीगु हे देशे भगवान बुद्धया जन्म जूगु खः, हानं भीपि मध्ये आपालं थौं बौद्ध अनुयायीत खः । संसारयात बौद्ध धर्मया देन तःधं जू । एशियाया तःतःधंगु देश बौद्धधर्मया अनुयायी खः । थ्व धर्मं जङ्गली जातियात सभ्य याना बिल व संसारया उच्चतम दर्शनया संख्याय् नं थ्वं वृद्धियात । माननीय प्रधान मन्त्रीं हानं धया बिज्यात—'भीसं भीगु निंति थ्व याना वंगु महान कार्यया महत्ता अबले थुइ, गबले बौद्धधर्मविलम्बी एशियाई मेगु देशया जनता नाप भी सम्पर्के थ्यनी ।' हानं श्री आचार्यजुं धया बिज्यात—'थ्व हे दें श्री ५ महाराजाधिराज्या राज्याभिषेक समये सिलोन, बर्मा, इण्डोनेशिया आदि देशया प्रतिनिधि नापलाः ब्ले जित तस्सकं लयना वल कि भीगु देशे नं क्रम्ह थुजाम्ह व्यक्तिया जन्म जुल, गुम्हसिगु कार्यं याना भीगु देश नेपाल श्रद्धा व भक्तिया आर्कर्णया केन्द्र बने जू वन । भगवान बुद्ध व बौद्धधर्म भीगु निंति क्रगू गौरवया खँ खः ।' माननीय प्रधानमन्त्रींजु लिपा खेद प्रकट याना नापं हानं विश्वास व्यागु सलं नवाना बिज्यात—'तर दुःखया खँ खः, थौं तक नं उम्ह महान व्यक्तिया आदर भीसं याये मफुनि । आः विस्तार विस्तारं भीके चेतना वृद्धि जुयावं वया चंगु दु, हानं भीगु देश संसारयात म्हसीका व्यूम्ह व्यक्तिया समुचित आदर याये फइ धयागु जित विश्वास दु ।' अन्ते श्री आचार्यजुं थ्व हे दें नवम्बर ७ तारीखं निसें जुइगु विश्व बौद्ध सम्मेलन विषये न्ह्यथना बिज्यात । अले सफलीभूत यायेत सरकारं नं तस्सकं दिलचस्पी क्या चंगु खँ व्यक्त याये धुंका धया बिज्यात—'जित थ्व सम्मेलनं नेपालीतयेत क्रगू अन्तरराष्ट्रीय दृष्टिकोण प्रदान याये फइथैं फइथैं ताः । अले नारा रूपे माननीय प्रधानमन्त्रींजु अन्तिमे धया बिज्यात—'जय भगवान बुद्ध, जय नेपाली ।' स्वागताध्यक्ष पदं नवाना बिज्यासे प्रिं प्रां से० श्री लोकदर्शनजुं तहाकःगु थःगु भाषणे धया बिज्यात—'संसारया वर्तमान त्रासमय बेलाय् भगवान बुद्धयागु उपदेशं आपालं महत्व तः । थ्व कारण भीसं थौं बुद्ध उपदेश द्वारा देशे शान्ति कायम जुइमा धयागु उहैश्य यायेमाः ।' अले वसपोलं धया बिज्यात—'प्यंगूगु विश्वबौद्धसम्मेलन सफल यायेत श्री ५ महाराजाधिराज नं आपालं रुचि क्या बिज्यागु दु हानं थुकी सरकारं पूरा सहायता याइगु दु ।' अनं सम्मेलन सफलीभूत यायेत सक्षितं आह्वान याना बिज्यात । महामहीम भारतीय राज-दूतं थःगु सारगभित भाषणे धया दिल—'थौंया दिन संसा-

रथ महानतम दिन मध्ये छन्हु खः । भगवान बुद्धं समता, स्वतन्त्रता तथा भाईचारा भावना फैले याना विज्यात । वसपोल संकुचित भावना व कट्टर भावनाया विरोधी खः । हानं वेकलं जोर बिया धया दिल—‘यान बिया स्वःसा सारा संसार वसपोलया ज्ञानया क्रणी खः ।’ परोपकारया जेनरल सेक्रेटरी श्री दयावीरसिंहजुं सभाय् नवाना धया दिल—वर्तमान विश्वया दुःख, पीड़ा, कलह आदि हाँ नापं लिना छवयेगु छगू मात्र उपाय वसपोलयागु सद्गुपदेशयात दुने नुगलं निसें पालन यायेगु खः । वसपोलं मातवताया विकाश व विशुद्ध समाजया रचनाया निंति क्यना विज्यागु पञ्चशीलया मूल आधार हे परोपकार खः । सभाय् कुमारी विमला देवी, श्री भूवनलाल प्रधान—हेडमास्टर आनन्दकुटी विद्यापीठ—भिक्षु सुबोधानन्द, जनकवि श्री धर्मराज थापा, कविवर शिवमंगल सिंह ‘सुमन’ या भाषण नं आपालं सारगमित नापं जनप्रिय जू । अन्ते सभापति पदया भाषण यासे श्रामणेर सुदर्शनं धया विज्यात—‘थौंया घड़ीया ए० एम० व पी० एम० या चान्हि त्याखं मखु, अपितु अस्त्रोदयं अस्त्रोदयया चा-न्हि त्याखं बुद्ध्या जन्म, बुद्धत्वं प्राप्ति, महापरिनिर्वाण स्वांया-पुन्ही खुनु जूगु खः । हानं थव २,५०० दँया जयन्ती बुद्ध शासन बच्छिं वंगु, ५००० दँलिपा लोप जुइगुलिं अर्द्धवय गतया संवेगं जक धुमधामं माने याना च्वंगु मखु । कारण ५००० दँ बुद्ध शासनया आयूला वसपोलं निश्चित समय बिया धया विज्यागु खः; सुनानं प्रयत्न मयाःसां तभि सारनाथे वसपोलं मनुज-भूमी तुइका विज्यागु धर्मचक्र चाहिलावं तुलावं वना च्वनी । थौं भीसं पूर्व इतिहासे खना गुलिखे प्रज्ञापुत्रपिसं थव धर्मचक्रयात विच्चे वया गति प्रदान याये धुंकल ।’ अन्ते बुद्धधर्मया चर्चा याये धुंका धया विज्यात—‘थौंया विज्ञानं तःमि जुया नं राजनीतिं चिका च्वंगु विश्वयात गुगुं त्वःगु धर्म दुसा व बुद्धधर्म खः ।’ सभाय् उपस्थित जूपिं मध्ये अर्थ मन्त्री श्री गुज्जमान सिंह, शिक्षामंत्री श्री बालचन्द्र शर्मा, प्रधान सेनापति जेनरल तोरण सम्मेर नं खः ।

सभा सिध्येवं डायसे बिज्याका तःगु अस्तिधातु सुसज्जित किसिम्हे तया विशाल जुल्स याना मरु, लगं, ब्रह्मूत्वाः, त्यूमत, भिमसेन थान, न्यतपाः जुका आनन्दकुटी ६॥ बजे थ्यंकल । जुल्से मिहगः स्वया विशेष बाजाखलःत व नरनारीया भीड़ दुगु खः । अले अस्तिधातु संरक्षणार्थ किसिम्हे नापं फिं मा० केशरसम्मेर नं च्वना झाल ।

पवित्र अस्तिधातु आनन्दकुटी थ्यनेवं प्रदीप पूजा जुल । थुकिं अतिरिक्त आनन्दकुटी एवं श्रीघःविहारे प्रातकालीन पूजा, शील प्रार्थना व धर्मदेशना नं जुल । आनन्दकुटी विद्यापीठया तत्वावधाने भिक्षु अश्वघोषया सभापतित्वे छगू सभा नं आनन्दकुटी जुल । येंया थव बुद्ध जयन्ती समारोह न्हापा न्हापाया देंथैं थुगुसी नं गठित जूगु बुद्धजयन्ती कमिटि याःगु खः । उकिं थुकिया सफलताया श्रेय कमिटिया अध्यक्ष भिक्षु सुबोधानन्द, सेक्रेटरी नन्दरल, कोषाध्यक्ष दयावीर सिंह सह सकल सदस्य एवं सहायक व शुभेच्छुकपिंत दु ।

गलू ६

भगवान बुद्ध्यागु २,५०० दँया महापरिनिर्वाण जयन्ती समारोह भव्य व विशाल जक मखु, ऐतिहासिक व धात्येया शब्दार्थं अभूतपूर्व नं खः । सुथ न्हापां स्वांया-पुन्ही खुनु बौद्ध भण्डोत्तोलन द्वारा यलया प्यन्हुयागु बुद्ध जयन्ती कार्यक्रम प्रारम्भ जुल । यलया मजिस्ट्रेट श्री बद्रिप्रसादजुं छवण्णरश्मया बौद्ध भण्डोतोलन याना धया दिल—‘संसारप्राप्त प्रेम, मैत्री व करुणाया छपु सूत्रे च्यूद्ध युगपुरुष केवल बुद्ध भगवान हे जक खः । उकिं वसपोलयागु शिक्षा भीसं ग्रहण याये फयेकेमा ।’ अले बुद्धजयन्ती समारोह समितिया सेक्रेटरी श्री आशाराम शाक्यजुं बुद्ध गुजागु युगे जन्म जुल हानं वसपोलं गुजागु लँ क्यना विज्यात धयागु विषये धाये धुकेवं श्री सत्यमोहन जोशीजुं थःत मनू धायेकेगु जूसा बुद्ध्या शिक्षा भीगु जीवनया कुने कुने दुत छ्वयेमा: धका धया दिल । अनंलि स्थानीय बूबहाया तारेमाम संघ व स्कूलया छात्रपिनि पाखें प्रभात फेरि जुल, गुगु यलया प्रथम प्रभातफेरि खः । निहने यलया दक्व धयार्थे भजन खलः, दापा व ज्यापु दाजुपिनिगु ध्यमे, बाँसुरी आदि बाजं खलः जम्मा चेखुथ्वः व ख्वीद्व न्हेद्व मनूतयेगु जुल्स सह भगवान बुद्ध्या मूर्ति खते तया शहर चाहिकल, गुगु मूर्ति ख्वसः दँ तक भूगर्भे सुला च्वंगु १७०० दँया इतिहास कुबिया च्वंगु गा: बहाया लुइ धुंका जिर्णोद्धार जूगुली स्थापना याइगु खः । जल्से विभिन्न सांस्कृतिक वाद्य खलतं अतिरिक्त बहाः बहीया थायपाजु (आज्जु) पिं नं थःथःगु पोशाकं पुना तुतः ब्वना विज्याना च्वंगु खः । लुँहिटी निसें, टंग, इखालखु जुना गा: बहाः स्वाःगु सांस्कृतिक दृष्टि अद्वितीयगु थव जुल्स गुलि भीत अभूतपूर्व जुया झक धाः, उलि हे विदेशीपिंत महत्वपूर्ण व आकर्षक जू । जुल्स बूबहाले थ्यनेवं छगू तःधंगु आमसभा माननीय

प्रयानमंत्री श्री टंकप्रसाद आचार्यजुया सभापतित्वे जुल । सकल अतिथिपिंत मजिस्टेट श्री बद्रिप्रसादजुं स्वागत याये धुंकेवं श्री आशाराम शाक्यजुं धया बिज्यात—नेपालया सुपुत्र भगवान बुद्धया सम्माने वसपोलयागु शिक्षा सदां प्रज्जवलित याना जनकल्याण यायेगु उद्देश्यं थौंयागु थ्व भव्य समारोह व कन्हे कंसया बौद्ध सम्मेलनया आयोजन यानागु खः । थ्व सम्मेलनया उद्देश्य नेपालयापि सकल बौद्ध जनपिंत एकताया सूत्रे माहनेगु व नेपाली मात्रे पारस्परिक प्रेम व मैत्री बलाकेगु खः । अनं श्री ५ महाराजधिराजयागु सन्देश प्रि. प्रा. से. श्री लोकदर्शनजुं न्यंका बिज्यात ।

श्री ५ महाराजाधिराजयागु सन्देश

थौंयागु बुद्धजयन्तीया शुभ अवसरे शित्प-प्रधान शहर ललितपुर जनसमूहया न्होने जिमिगु हार्दिक शुभ-कामना छ्वया हये दया साप हे लयतः वः । थ्व शहरयागु स्तूप, बुद्धयागु प्रसिद्ध मंदिर तथा विहारं जिमित राजर्षी अशोकया भगवान बुद्धया प्रति दुगु अमर प्रितियात लुमंका व्यू । बुद्ध । उपदेश तथा बौद्ध संस्कृति थनयागु कालिगरी अंकित जुया च्वंगु जिमिसं खं । भगवान बुद्धयाके जिमिगु थ्व हे प्रार्थना दु, थौंयागु अभूतपूर्व समारोहं यलया फुक जनताया एकताया मैत्री भावना जागृत याना शान्तिया पथ प्रदर्शन जुया उत्साह व उमंगया प्रकाश फैले याना देश व जनताया कल्याणया अविवृद्धि यायेमा ।

जय नेपाल

सभाय् श्री लोकदर्शनजुं थःगु भाषणे थमं लंकाय् स्वया वयागु बौद्ध चरित्र विषये विवेचना याना धात्येया अर्थं आघरणं नं सकलें बौद्ध जुइ सेकेगु निंति आहान याना प्यंगुगु विश्व बौद्धसम्मेलने न्हायतयेमाः धयागु पाखे नं जन-हृदय आकर्षितं याना बिज्यात । भारतीय कवि श्री शिवमंगलसिंह सुमनं थःगु काव्यशैलीया भाषणं सकसिगु थ्यान आकर्षित यात । तदन्तर शिक्षा मंत्री श्री बालचन्द्र शर्मां बुद्धया शिक्षा सम्बन्धी चर्चा याना दी धुंका वसपोल प्रति श्रद्धांजलि अर्पण यात । बुद्ध जयन्ती समारोह समितिया कोषाध्यक्ष श्रो पूर्णबहादुरजुं थःगु वक्तव्य बिया संक्षिप्त रिपोर्ट न्यंका बिज्यात । अन्ते सभापतिया पदं भाषण याना माननीय प्र. मं. श्री टंकप्रसाद आचार्यजुं भगवान बुद्ध नेपालीतये तःदाजु परे जूगु सम्बन्ध क्यने धुंका वसपोलं क्यना बिज्यागु ज्या बालाक याये मफुगुली खेद अनुभव याना आः खुनु छुं उचित कदर यायेगु निंति आहान याना बिज्यात । श्री आचार्यजुं

अन्ते धया बिज्यात, “बल भीसं लुम्बिनी उद्धार यायेगु ज्या आः तिनि छुं भति याये खन । ‘अनं सभा जुयावं च्वंबले तकं न्व्यानावं द्वाहाँ वया च्वंगु जुल्स २ घण्टा लिपा पवःचाल । बहनी प्रदीप पूजा छेंखा छेंखां यात । कन्हेखुनु व कंस खुनु निश्चित इले बौद्ध सम्मेलन क्रमशः भिक्षु अश्वघोषया व भिक्षु प्रज्ञानन्द महास्थविरया सभापतित्वे जुल । सभाय् पश्चिम पाखें श्री चाँदं, ख्वपया प्रतिनिधिं, त्रिशुलीया पाखें श्री धर्मरत्न शाक्यं व जिल्ला जिल्लायापि प्रतिनिधिपिसं थःगु परिस्थिति व बौद्धपिनिगु गतिविधी प्रकाश यात । महामहीम भारतीय राजदूत श्री भगवान सहायजुं बिया दीगु भाषणं श्रोतावर्ग तस्सकं प्रसन्न व प्रभावित जुल, (गुगु थ्व अंके प्रमुख लेख रूपे प्रकाशित जुया च्वंगु दु) । प्रो० वाके व श्रीमती वाकेपिनिगु अनुसन्धात्मक भाषणं जनता तस्सकं प्रभावित जुल । भं श्री लोकरत्न तुलाधरजुं हायेका रिकार्ड क्या तःगु ‘गुरुजु जय नम…लुम्बिनी वनस बिज्याक’ म्ये न्यना सकले आचर्यान्वित जुल । थुकि अतिरिक्त सम्मेलने श्री बालकृष्ण सप्त, श्रामणेर सुदर्शन, श्रीमती मोतिलक्ष्मी, प्रो० रेणुलाल, श्री चित्तधर ‘हृदय’, श्री डा० जगतचन्द्र मोहनपिनिगु सारगम्भित विशेष भाषण जुल । मेपि भाषण याना दीपि मध्ये बैद्य सर्वज्ञराज, पं० हर्षराज आदिपिनिगु नाँ न्हथने बह जू । सम्मेलन-विशेषता भाषणं अतिरिक्त सांस्कृतिक प्रोग्रामया समावेश जुया च्वंगु खः । गुको सत्यमोहन जोशीजुया ‘गौतम बुद्ध’ या रूपक, श्री कांक्षा गुरुजु व स्थानीय बालक बालिकापिनिगु म्ये, पं० आशाका-जीयागु ‘जय महाकाल’ धयागु नेपाल भाषाया चचा व दापा दुथ्यागु खः । सम्मेलनया अन्तिम दिने श्री चित्तधर ‘हृदय’ जुया सभापतित्वे छगू कविगोष्ठि जुल । गुकी बुद्धया जीवनी, सम्बन्धी कविता पाठ जुल । सर्वप्रथम श्रीमती नारायण देवीं ‘क्वां वा गौतम क्वां वा देव’ कविता स्वयं पाठ याना दिल । तदन्तर श्रामणेर सुदर्शन, कविवर सिद्धिचरण, बैकुण्ठप्रसाद ‘लाकौल’, दूर्गालालपिसं थःगु कविता न्यंकल । अले भारतीय कवि श्री शिवमंगलसिंह सुमनजुं थःगु सासःया विषये च्वया तःगु कवितां श्रोतापिनित तस्सकं प्रभावित यात । नापं पश्चशील विषये च्वया तःगु क्वपु कवितां आपालं मनोरञ्जन सह ज्ञां बिल । अन्तस साहित्यशिरोमणी श्री चित्तधर ‘हृदय’ थःगु लुम्बिनी व बुद्धया संस्मरणे च्वया तःगु कविता न्यंका सभा सिधेकल । कन्हे खुनु अर्थात् चौठी खुनु विधिवत् गा-बहाले बुद्धमूर्तिया स्थापना जुल । थ्व नं स्मरणीय खः, यले

बुद्ध जयन्ती थथे व्यापक रूपं माने यायेगु जया क्वाः बहाः या
तरेमास संधं छूगु खः, अनं उबहालं याये धुंका थुगुसी
बूबहालं याः गु खः, वइगु दं नबहिलीं यायेगु घोषणा यात ।
सप्रसंग थव अभूतपूर्व जयन्ती व सम्मेलन, आयोजनया श्रेय
विषये नं च्वयां छुं अत्युक्ति मजू । थव सम्मेलनया श्रेय
बुद्धजयन्ती कमिटियात दु, तर विशेष रूपं श्री आशाराम
शाक्यजु व श्री भक्तकृष्ण उपासकयात बीमाः ।

रत्नक्रिप्तः

२,५०० दँया स्वांया-पुन्ही मढोत्सव रूपपं नं यें, यलया
प्रतिस्पर्धाय थ्यंक धुमधामं माने यात । प्रातकालीन बुद्ध-पूजा,
शील प्रार्थना व धर्मदेशना मुनि विहारे भिक्षु रत्नज्योतिया
पाखें जुल । ११ बजेती प्रि. प्रा. से. श्री लोकदर्शनजु विहारे
विज्यात तथा बुद्धधर्म व विहार सम्बन्धी चर्चा जुल । न्हिने
मूर्तिया जुल्स गुगु प्रकारं जुल, व तस्सकं आकर्षक खः । जुल्स
मुनि विहारं पिहाँ वना गोल्मधि, सुकुलच्वखा, तःमरि, इनाछें,
खौमा, लायकूच्वखा, छुमा, महालक्ष्मी, तपचाल लं जुका
विहारे तुं लित हल । जुल्से बाजं खलः, वेन्, धेमे, दापा,
गुँला बाजं, बाँसुरि, ज्ञानमाला भजन, तुतः ब्वंपि व ताय्
अवीर हला वःपि मिसात नापं निद्वलं मयाक मनूतयेगु
अन्दाज याः गु दु, गुकी रूपया मजिस्टेटजुं सह आपालं
राजकर्मचारीपिसं नं भाग काः गु खः । मजिस्टेटजुं नारा उठे
याना दिल, अले महात्माबुद्ध अमर हो, विश्वशान्ति कायम
होस् नारां रूप दे गुंजायमान जुल । जुल्स पवः चालेवं
सन्ध्याया ५ बजेती मुनि विहारे मजिस्टेटया सभापतित्वे
छगू सार्वजनिक सभा जुल । सभाय् बुद्धजयन्ती समारोह
कमिटिया सेक्रेटरी श्री रामसुन्दरजुया भाषणं लिपा कोषाध्यक्ष्य
श्री भीमराजजुं रिपोर्ट न्यंकल । अले हाईस्कूलया प्रतिनिधि
महानुभावं पञ्चशील विषये व्याख्या याये धुंका थुकिया पालन
प्रत्येक जाति यायेमाः धका जोर बिया दिल । श्री सम्यकरलजुं
बुद्धजयन्ती छाय् माने याये माः गु विषये धाये धुंका बुद्ध
जीवनी व उपदेशया विषये नवाना विज्यात । अन्ते
सभापतिजुं उपस्थित जनतायात सम्बोधन याना बुद्धया
आदर्शमय जीवनीं जीवनयात प्रेरणा कायेगु, वसपोलयागु
उपदेश मानवमात्रं ह्यसीकेगु निति प्रेरणा बिया सभा विसर्जन
यात । वहनी प्रदीप पूजा नं बांलाक जुल ।

भौट्टः

थुगुसी २,५०० दँया महापरिनिर्वाण जयन्ती समारोह

विगत वर्षे स्वया विशेष प्रकारं बांलाक जुल । प्रातः ७ बजेती
हे श्री लोकेश्वर स्थानं निसें सकले नुना भगवान बुद्धया
मूर्ति रथे विजयाका जुल्स न्व्यात । जुल्से बाँसुरि धेमे,
गुँला बाजं, तुनखलः, भजन खलखं अतिरिक्त बुद्धजीवनीया
म्ये हाला ताय व अबीर हला वःपि नर-नारीपि नं दुगु जुल ।
जुल्स विहारे लिथ्यनेवं ९ बजेती चन्द्रकीर्ति विहारे प्रान-
कालीन बुद्ध पूजा, शील प्रार्थना व धर्मोपदेश श्रामणेर मेधं-
करया पाखें जुल । बहनी गिलान-पूजा नं सम्पन्न जुल ।
शायद बुद्ध जयन्तीया जुल्स थव हे भों देशया प्रथम जुइमाः,
समाचारे धया तःगु दु थुगुसीया थव जुल्स अभिनव जुया
आपालं नरनारीपिसं सोत्साहं भाग काल । हानं थव जुल्स
आः प्रत्येक दें जुगु आशा नापं आगामी दं निसें मिटिंग
छगू नं यायेगु निर्णय याः गु दु । अले थुगुसीया जुल्सया
आयोजनया सफलतां बुद्ध-जयन्ती आयोजकपिसं आगामी वर्ष
निसें बांलाक चलेवं जुया वनीगु नं आशा नापं विश्वास
या.गु दु ।

स्वांगुः

थुगुसीया २,५०० दं क्वांगु जयन्ती स्थानीय सुगतपुर
विहारे श्री रत्नदेव शाक्य व श्री बेखारत्न शाक्यया नेतृत्वे
बांलाक सम्पन्न जुल । सुथे ६ बजे निसें श्री त्रिभुवन
मिडिल स्कूलया छात्रपि 'आह्वान' धयागु म्ये हाला प्रभात
फेरि रूपे जुल्स पिहाँ वल । अले स्थानीय विहारे नर-
नारीपि एवं छात्रपि सम्मिलित जुया शील प्रार्थना व बुद्धपूजा
नं यात । न्हिने बुद्ध-मूर्ति खते तया बाजार परिक्रमा-
या आयोजन जुल । समाचारे ज्ञात जूगु दु, जुल्से स्था-
नीय विशिष्ट नर-नारीपि बाहिक गोश्वरा, माल, अदालत
व इन्स्पेक्टररीयट आफिसया उच्चपदाधिकारीपि स्मेतं उप-
स्थित जूगु दु । जुल्स विहारे ध्यनेवं छगू आमसभा रूपे
परिणत जुल, गुकिया सभापति आसन जिल्लाया बड़ाहाकिम
श्री चक्रभक्त उपाध्यायं ग्रहण याना दिल । सभाय् नवाना
पुलिस थानाया हाकिम इन्स्पेक्टर श्री दुर्गादित्त उपाध्यायं
धया दिल—‘पञ्चशील पालन मयाः गुलि हे देशे अशान्ति
व आतंक आदि अनुचित वातावरणं तोपुया तःगु खः ।’
अले देश व जनताया निति पञ्चशीलया आवश्यकता क्यना
दी सिध्येकेवं श्री द्रव्यरत्न शाक्यजुं नं पञ्चशील मनुखं
जीवने व्यवहारिक रूपे महयेवं मनु मनूया श्रेणीं कुतुं वनी
धका क्यना दिल । तदुपरान्त श्री रामजी शर्मा वंगु पुरो-

हितवादया सामन्तनीतिया खण्डन याना धया दिल, आःया थ युगं 'न पठेत् यामिनी भाषा न गच्छेत् बौद्ध मंदिरम्' धयागु आज्ञा सुनां न्यनी ? गुलि सत्य खनी ?' अले श्री रवीरत्न शाक्य व चक्रमान 'चाटक' जुया भाषण सिध्येवं विहारया सेक्रेटरी श्री बेखारत्न शाक्यं बुद्धधर्म व उकिया आधुनिक युगयात ल्वःगु माःगु खें चर्चा याये धुका सकसितं धन्यवाद बिल। जिल्ला गोश्वराया सुब्बा जयदेव उपाध्यायजुं थव २,५०० जयन्ती विश्व व्यापक रूपं माने जुया च्वंगुली सांगु नं थःगु कर्तव्य पालन याये फुगुली ल्यताः प्रकट याना दी धुकेव सभापतिजुया बुद्धया उपदेश हृदयंगम याना थःथःगु चरित्र सुधार याना देशे सुख शान्ति हयेगु सारगम्भित भाषणं लिपा सभा विसर्जन जुल। सन्ध्याइले प्रदीप-पूजादि नं जुल।

तान्त्रेन्नः

तथागतया २,५०० गूगु महापरिनिर्वाण तिथि जयन्ती विश्वया विभिन्न देशं, देशया विभिन्न भूभागं धुमधामं माने याःयें तान्त्रेन नं न्हापा न्हापाया महोत्सवया उपेक्षा बांलाक माने यात। प्रातकालं निसेंया कार्यक्रमे सर्वप्रथम भिक्षु शाक्यानन्द पाखें उपस्थित नरनारीपित शील बीगु, अले बुद्ध-पूजा, तथा धर्मदेशना जुल। समाचारे धया तःगु दु, थव सुथंनिसेंया कार्यक्रमे हे आपालं नरनारीपिसं व तान्त्रेनया बड़ाहाकिम श्री लभसमसेर तथा कौशल्या सुब्बा आदि सरकारी उच्च कर्मचारीपिसं भाग काःगु दु। धर्मदेशना उपरान्त बोधिवृक्षे लः बीगु ज्या जुल, गुगु नेपाले दुने थन छथाय् हे जक जूगु खने दु, हानं गुगु बर्मा, लंका आदि बौद्धदेशया अनुकरणीय अनुकरण खः। न्हिने २ बजेती भगवान बुद्धया रथ यात्रा प्रारम्भ जुल। गुकी बेनबाजा, पंचम, टक्सार व आनंदविहारया ज्ञानमाला भजन खलः, दाफा आदि आधुनिक व सांस्कृतिक बाजां अतिरिक्त पद्मोदय हाइस्कूल, जनता विद्यालय, कन्या पाठशालाया फुक छात्र छात्रापिं बौद्ध भंडा ज्वना नारा लगे याना वया च्वंगु खः। जुल्स न्याद्रलं मयाक मनूतयेगु श्रद्धार्पण उत्साहं गुलि भक्तधाः, उलि हे लभसमसेर सह उच्चसरकारी कर्मचारी एवं साहु महाजनपिनिगु उल्लास पूर्ण सहयोगं विशेष आकर्षक नं जू। अले छें क्वेक्वे थ्यनेवं इयालं इयालं स्वानं पूजा याना हःगुलि नातिदूत लुम्बिनी २,५८० दँ न्हापाया पुष्पवर्षायात लुमंका बिल। समाचारे थव नं ज्ञात जूगु दु, जुल्से भाग-

काःपित त्वा त्वाले शरवत पान याका प्यास नं तंका बिल। समाचारे धया तःगु दु, छगु आमसभा जक न्व्यरखुनु न्हिन-सिया प्यता इले बड़ाहाकिम श्री लभसमसेरजुयागु सभापतित्वे जूगु खः, गुकी आपालं स्थानीय विशिष्ट व्यक्तिपिसं शिक्षकपिसं बुद्ध व वसपोलया उपदेश सम्बन्धी सारगम्भित भाषण नं यात। बहनी प्रजावैत्य महाविहार व आनंद विहार निगुलिसं स्थानीय श्रद्धालुपिसं प्रदीप-पूजा यात, अले ज्ञानमाला भजन नं चन्दिं जुल। समाचारे धया तःगु दु, थुगुसीया बहुसंख्यां भाग काःगु, बांलाक धुमधामं जूगु थव २,५०० दँया जयन्ती स्वया बुद्ध व वसपोलया उपदेश प्रति श्रद्धा व विश्वास तयेत तान्त्रेन छगुलि हे पल्टे जुल धाःसां भ्या हे द्वं जुइ मखु।

बागलुँगः

भगवान बुद्धया २,५०० दँ क्यंगु महापरिनिर्वाण उत्सव व जयन्ती स्थानीय ज्ञानोदय महाविहारे बांलाक सम्पन्न जुल। सुथे शील प्रार्थना व बुद्ध पूजां लिपा न्हिन-सिया कार्यक्रमे स्थानीय (शाक्या ?) प्रजापरिषद्या सभापति श्री तेजेन्द्रबहादुरजुया सभापतित्वे छगु आमसभा जुल। सभाय ज्ञानोदय पुस्तकालयाध्यक्ष श्री कृष्णलाल शाक्य, सेक्रेटरी श्री रामलाल बझा, परोपकार अध्यक्ष श्री शिवकुमार प्रधान, हाइस्कूलया हेडमास्टर श्री गोरखबहादुर, श्री टीकाबहादुर मल्ल, मा. श्री महेशकुमार भण्डारी, श्री कुलप्रसाद श्रेष्ठ, श्री श्री वैकुण्ठप्रसाद, श्री अभिकुमार बझापिसं थःथःगु भाषण न्यंका दिल। अले थव ऐतिहासिक दिन नेपालया निर्ति तःधंगु दिं खः धका धया सकसित धन्यवाद बिसे सभापति सभा विसर्जन याना दिल। समाचारे धया तःगु दु, थन नं रथयात्रा धुमधामं सम्पन्न जुल।

बुट्टवलः

बुट्टवल बजारया छगु मात्र दुगु पद्मवैत्य विहारे २,५०० दँया जयन्ती न्हापा न्हापायें बांलाक सम्पन्न जुल। पुन्ही छन्हु न्व्यो बहनी बुद्ध-पूजा बुद्धजयन्ती कार्यक्रम प्रारम्भ जुल, अले सारा चन्दिं ज्ञानमाला भजन जुल। समाचारे धया तःगु दु, पुन्हीसिया बहनी ग्रहण दया: बहनो जुहगु यात्रा न्हिने तुं यात। यात्रा फुक बुट्टवल बजार परिक्रमा जुल। अले प्रसाद वितरण एवं प्रदीप-पूजादि जुया जयन्ती सम्पन्न जुल।

बलम्बु ४

२,५०० देया जयन्ती शहर शहर माने याथे गांगामं नं धुमधामं माने या-गुली बलम्बु अर्थात् भास्तिपुरं नं थः ल्यूने मलकेया निंति गावकं प्रयत्न यात । स्थानीय प्रतिधिरूपं महाविहारे शील-प्रार्थना, बुद्ध-पूजा, धर्मदेशना श्रामणेर धर्मवंश पाखे जुइ धुंका छगू जुल्सया नं आयोजन नं जुल । जुल्से जवं खवं च्वंगु गाँत व क्यपुलचा नं मिले जुया बुद्धया मृत्ति खते तया परिकमा जूगुलि जुल्स नं निककै तहाक जूथे सांस्कृतिक बाजा आदि भक्त नं धाः । जुल्स सिध्येवं बहनी पाखे प्रदीप-पूजादि नं बांलाक जुल ।



समाचारे ज्ञात जूगु दु, यले सुमंगल विहारे व यम्पि विहारे नं स्वांया-पुन्हीया विशेष आयोजन जुल । सुमंगल विहारे बौद्धसंघया तत्वावधाने स्वांया-पुन्ही आयोजन सिल-सिलाय् सुथं निसें विशेष पूजा, भोजन प्रदान आदि जुल । हानं यें नं त्वाः त्वाले बहाःबहाले पौभाः आदि छाय्पाः पूजा आदि जुल । असने ला भं सम्यक् द्यो समेतं इवः इवः व्यया स्वांया-पुन्ही माने यात ।

भौजपुर ५

२,५०० गूगु बुद्ध जयन्ती समारोह समिति पाखे भोजपुरे नं बांलाक विशेष प्रकारं जयन्ती सम्पन्न जुल । जयन्ती निन्हुया कार्यक्रमे चतुदर्शी खुनु बहनीया पूजां प्रारम्भ जुल । पूजा पश्चात् नेपाल भाषां बुद्धत्व प्राप्तिया निंति तपस्या याःगु, देवदत्तया मन्त्रणां मगध सम्राट् बिम्बिसारयात् थःकाय् अजातशत्रुं कुकृत्य याःगु, लिपा पश्चाताप याना बौद्धधर्मे दिक्षीत जूगु आदि घटनाया नाटक क्यना चर्चिक्क बिते यात । पुन्ही खुनु सुथे प्रभात फेरि जुल । अले प्रणिताकारं बुद्ध-पूजा, शीलप्रार्थना व भजनादि जुल । १२ बजे तकं नर-नारीपिनिगु व विशेष आमन्त्रित व्यक्तिपिनिगु आगमन व पूजा आदि जुयावं च्वन, गुकी स्थानीय हाइस्कूल, संस्कृत पाठशाला, अनेक संस्थाया झण्डा ज्वना वःपिं नव-युवक, ने. प. स्काउट व स्कूल यूनियन खेलाडी टीमया नां न्वथने बहूजू । निहने भिन्निता थाय् धुकेवं रथ यात्रा शुरु जुल । जुल्सया ‘भगवान् बुद्ध जय ! विश्वशान्ति कायम जुइमा ! बौद्ध-धर्म अमर जुइमा !’ धयागु नारां सर्ग थवया च्वन । अले नारायात धेमे, नायखिं, धाः, भुस्याः, छुस्याः दापा आदि

सांस्कृतिक बाजनं भःभः धायेका च्वन, ज्ञानमाला भजन, खोत्र, पूजाया च्वनि महत्व बियाच्वन । जुल्सया सम्मान स्वयं-सेवकपिसं व त्वाःत्वाःया शरवत त्वंकूपिसं याना च्वन । अले बिचे बजारे थ्यंबले ला बड़ाहाकिम सह गोश्वरा, माल, अदालत, ब्यारेक, पुलिसया उच्चपदाधिकारीपिसं स्वागत याः बले ला भं हे जुल्सयात अभूतपूर्व विशेषता एवं महत्ता बिल । अन्ते जुल्स शाक्यमुनि विहारे लिथ्यनेवं छगू आमसभाया रूप काल, गुकिया सभापति श्रीमान बड़ाहाकिम जुया दिल । द्वन्द्वि यागु सभाया भीड़यात सम्बोधन् याना बौद्ध संघया मंत्री श्री हेमबहादुर शाक्यजुं बुद्ध जीवनी कना बिज्यात, बुद्ध जयन्ती समारोह समितिया मंत्री श्री लालधन शाक्यजुं बौद्धधर्मे दुगु समानाधिकार व आधुनिक युग व बुद्धधर्मया आवश्यक समन्वय विषये चर्चा याये धुंका समितियात आर्थिक सहायता व्यूपि एवं समारोह सफल यायेत थास थासं उपस्थित जूवःपिं धन्यवाद बिया प्राप्त जूगु शुभेच्छा-पत्र व्वना न्यंकल । मेपि सभाय् भाषण याना दीपि मध्ये शिक्षक संघया मंत्री श्री ललितबहादुर प्रधान, कालिका स्कूलया आयोजिका सुश्री शीलशोभा, भोजपुर इन्स्पेक्टर श्री ओंबहादुरजु, हाइस्कूल पाखे श्री शरदचन्द्र शर्मा, छात्र श्री रत्नबहादुर टमोट, श्री बाशुदेव ताम्राकारपिनिगु नाँ उल्लेखनीय जू । अन्तस सभापतिजुं बुद्धया जन्म नेपाले जूगु खें गर्वानुभव याका धया दिल, भीसं बुद्धया प्रशंसा जक याना मगाः, धात्यें ला वससोलया आदर्शयात भीसं बांलाक कार्यान्वित याये फयेकेमाः । तदन्तर सभा सिध्येवं प्रदीप पूजा, ज्ञानमाला व दाफा भजन नं बहनी जुल ।

चैन्पुर ६

२,५०० गूगु जयन्ती न्हापा न्हापाया जयन्ती उपेक्षा बांलाक विशेष प्रकारं अभूतपूर्व रूपं जुल, गुकिया निंति न्हेन्हु न्व्यो निसें ज्ञानमाला संघं आयोजक कमिटि गठन याना आयोजना याःगु खः । सुथे शीलप्रार्थना, भजन व बुद्ध-पूजा आवाल-बृद्ध-वनिता सकले सम्मिलित जुया श्रद्धापूर्वक यात । चैनपुर अर्थात् पूर्व ६ नं० बाजार छगुलि रंग विरंगया तोरण, द्वार, ध्वजां छाय्पायका तःगु व गीत वाद्यया वादनं उखुनु चैनपुर नगरया रूप हे मेगुर्थे जुल । निहने स्थानीय ज्ञानमाला संघया सदस्यगण, बजारया गण्यमान्य भाजु मयूजुपि, छात्र व छात्रापिनिगु छगू जुलूसं नं पिहाँ वल, गुकी “गौतम बुद्ध, अमर जुइमा ! विश्व शान्ति अमर जुइमा,

विश्व मैत्री कायम जुझमा ।” आदि विभिन्न प्रकारया शांति एवं सत्यपूर्ण नारां बजार गुंजे जुल । जुलूस श्री सिद्ध विहारे थ्यनेवं हानं बुद्ध मूर्ति रथे तया यात्रा यात । रथ परिक्रमा नं समाप्त जुझवं बहनी श्री अष्टराज वज्राचार्यया सभापतित्वे छगू साहित्य व संगीत सम्मेलन जुल । सम्मेलने सर्व प्रथम समितिया मन्त्री भरतकुमारजुं समितिया रिपोर्ट न्यंके धुंका भगवान बुद्ध व वसपोलया शिक्षा संबन्धी भाषण याना दिल । सभाय् मेमेपिं महानुभावपिसं, लेखक-पिसं, संगीतज्ञपिसं भाषण व लेख, कविता-कहानी पाठ एवं संगीत न्यंकेगु याना दिल । अन्ते बहनी १० बजेती सभापतिजुं सारगम्भित भाषण न्यंकालि सभा विसर्जन याना विज्यात ।

ज्ञात जूगु दु, थथे हे नेपालया उखे थुखें शहरे व पहाड़ी अंचले २,५०० गूगु जयन्ती जूगु दु । पोखराय् नं स्थानीय विहारे स्वांया-पुन्ही माने यात तथा बीरगंजे नं मीनाबजार स्थित नेवात मुना स्वांया-पुन्ही महोत्सव माने यात ।

बुद्धग्रामः

गुगु वृक्ष-मुले वज्रासन याना सिद्धार्थ बुद्धत्व प्राप्त यात, क्षण भंगरता अमर अनन्ते परिणत जुल, मृत्युं अमृतपदया लँ खने दत, अन व दिंया संस्मरणे व २,५०० दँया परिनिर्वाण महोत्सवे बोधिवृक्षया पूजा विहार प्रान्तया गवरनर श्री आर. आर. दिवाकर प्रसुख आपालं सरकारी पदाधिकारी, आपालं देश विदेशया श्रद्धालु प्रज्ञापुत्रपिसं यात् । हानं थव जयन्ती न्येद्व मनुखं मयाक सम्मिलित जूगुलिं बुद्धग्रामया वंगु गुलिखे सदिया निंति अभूतपूर्व ऐतिहासिक रूप काः वन । आकाशं वायूयानं स्वां वा गाकू बले धात्यें थव हे स्वांया-पुन्हीया दिने बुद्धत्व प्राप्त जूबले पुष्पवृष्टि जूगु लुमंका बिल । सम्मेलने दके स्वये बहगु बुद्ध व बौद्ध इतिहास सम्बन्धी प्रदर्शनी खः । विशाल रूपं जूगु जुलूसे भारत, पाकिस्तान, लंका, बर्मा, थाइलैण्ड, काम्बोडिया, वियतनाम, नेपाल, तिब्बतयापि बौद्धपिसं नं भाग काल । जुलूसया अनेक आकर्षक विशेषता व महत्व मध्ये जुलूसया छपु विशाल बौद्ध झण्डां सर्वाधिक मनूतये स्मृतिपटे थाय् काल ।

सारनाथः

तथागतं दक्षिणे न्हापां धर्मचक्र चाहिका विज्यागु पुण्य-भूमि सारनाथे वसपोलया २,५०० दँ वयंगु महापरिनिर्वाण जयन्ती खन्हु तक ऐतिहासिक व बौद्ध सांस्कृतिक रूपं सम्पन्न जुल । आपालं भिक्षुपिं बाहिक देश विदेशया यात्रीपिनिगु समूहं थव ऐतिहासिक जयन्ती भं विशेषता प्रदान यात । पाठ-पूजां अतिरिक्त सभा आदिया आयोजन नं बालाक जुल ।

कुशीनगरः

तथागतया महापरिनिर्वाण भूमि कुशीनगरे २,५०० दँ वयंगु जयन्ती गुगु विशेष प्रकारं यात, व ऐतिहासिक एवं अभूतपूर्व खः । प्रातकालीन पूजां अतिरिक्त स्थानीय स्कूल कालेजया छात्रपिनिगु प्रभात फेरी जुल । अले देश विदेशया द्वलंद्र नरनारीपिनिगु छगू जुलूस बुद्धप्रतिमा परिक्रमा नापं यात । जुलूस समाप्त जुझवं छगू विशाल सभा नं जुल, गुकी स्थानीय व विदेशी यात्रीपिसं विशेष भाषण यात । सन्ध्याइले प्रदीप पूजादि धार्मिक कार्य व सांस्कृतिक आयोजन नं सम्पन्न जुल ।

दिल्लीः

भगवान बुद्धया पञ्चशीलया आधारे पञ्चशील-नीति विश्वे शान्ति हयेगु प्रयत्न याना चंगु शान्तिप्रिय बुद्धया विचरित भूमि भारतया राजधानी दिल्ली २,५०० गूगु महापरिनिर्वाण जयन्ती गुगु रूपं माने यात, दिल्लीया रामलीला मैदाने गुगु सभा जुल व अनेक दृष्टि अत्यन्त अनुपम नापं अभूतपूर्व खः । कारण थव हे प्रथम विशाल समारोह खः; गुगु दिल्लीया भाग्ये नं राष्ट्रीय जक मजूसे अन्तरराष्ट्रीय घटना जुल, गुगु विशाल सर्वजनिक सभायात राष्ट्रपति डा. राजेन्द्रप्रसादं छगू मेगु अभूतपूर्व ऐतिहासिक सौभाग्य नं प्रदान याना दिल । कारण थव हे न्हापांगु सर्वजनिक सभा खः; गुकिया सभापतित्व भारतया राष्ट्रपति डा. राजेन्द्रप्रसादं ग्रहण याना दिल । थःगु अभिभाषणे राष्ट्रपति गुगु श्रद्धाअभिशिक्त सारगम्भित उद्गार पिकया दिल व पत्रकार जगतया सम्बाददातातये निंति अविस्मरणीय सः खः । राष्ट्रपति देवतापिनियःग्ह जुजु अशोकं कलिंग विजयं लिपा गुगु शान्तिमय नीति ग्रहण यात, व हे नीति स्वाधीन भारतं सम्पूर्ण रूपं व्यावहारिक तौरं ग्रहण याये फइगु आशा व विश्वास व्यक्त याना दिल ।

उपराष्ट्रपति सर राधाकृष्णन् एवं प्रधान मंत्री श्री नेहरुजुया भाषणया सारांश अर्थे राष्ट्रपतिजुया शान्तिया निति व्यूगु अभिभाषणे हे दुर्ध्याः । प्रधान मंत्री श्री नेहरु हानं धया दिल—इतिहासे आपालं युग पुरुषपिसं थः थःगु समये आपालं कीर्ति फैले याना वन, इमित याकनं त्वःनं मंकल, तर बुद्ध्या सः थौंतकं भीगु न्हायपने थ्यया च्वंगु दु, हानं भीसं दुःख अनुभव यायेमाः छायकि वसपोलयागु सन्देश बांलाक स्यना थुइका मकाः ।

कलकत्ता :

२,५०० गृगु महापरिनिर्वाण महोत्सव स्थानीय महाबोधि सभा, बुद्ध महासंघ, बंगाल बुद्धिष्ठ अशोसियसन आदि सभां अतिरिक्त सरकारी बुद्ध जयन्ती आयोजक समिति पाखे सम्मिलित रूपं व थःथःगु क्षत्रे गुगु समारोह यात व ऐतिहासिक नापं अभूतपूर्व सांस्कृतिक समारोह खः । खुन्हुया विशेष कार्यक्रमे पूजा, अस्तिधातुया प्रदर्शनं अतिरिक्त सभा व जुलूस विषये च्वयेगु अःपु मजू । २३ मई खुनु जुलूस बैरकपुर ट्रॉकरोड निसें प्रारम्भ जुया श्याम बजार, चित्तरंजन एभिन्यू, चौरंगी रोड, आशुनोष मुकर्जी, रस्सारोड, राशविहारी एभिन्यू जुना देशप्रिय पार्क बालिगंज थ्यनेव जुलूस फ्रवःचाल । जुलूसे बर्मा, लंका, श्याम, चीन, तिब्बत, जापान, नेपाल, कम्बोडिया, इन्दोनेशिया, सिक्किम, भूतान, आदि विदेशीपि नं दुगु जुल । सरकारी बुद्ध जयन्ती समारोह समिति पाखे फुक देश विदेशया जुलूसे भाग काःपित ४२ गः द्रक्या नं प्रबन्ध याना व्यूगु खः । अले प्रत्येक देशायापिसं थःथःगु सांस्कृतिक रूपं जुलूसे सजधज याना भाग काल । नेपालया पाखे भाग कायेत द्रके ‘स्वयम्भू’ दर्येकल । थ्व अन्तरराष्ट्रिय जुलूस ख्ययेगु निति थुलि मनूतयेगु भीड़ जुल कि मार्शल बुल्गानिन भाःबलेयागु भीड़या तुलना मनूतयेसं याउंक यात । अले देशबन्धु-पाके २४ मई खुनु सर जदुनाथ सरकार, एक्स-भवाइस चान्सलर कलकत्ता युनवंसिटीया सभापतित्वे विराट जनसभा जुल । सभाय् भाषण विया दीपि मध्ये पंश्चिम बंग राज्यसभाया स्पीकर श्री शैलकुमार मुकर्जीया नां उल्लेखनीय जू । विख्यात इतिहासज्ञ सभापति श्री जदुनाथ सरकारं सभापति पदं नवाना धया दिल, संसारे कलह त्वापुं भयविद्या च्वंगु थ्व समययात भगवान बुद्ध्या सन्देश मेमेबले ख्या आवश्यक जू । २५ मई खुनु कलकत्ताया नगरपालिकाध्यक्ष श्री शनीशचन्द्र घोषया सभापतित्वे जुल । सभाय् भाषण याना

दीपि मध्ये भाषा विशेषज्ञ पश्चिम बंग लेजिस्लैटिभ काउनिसलया चियरमैन श्री सुनीतिकुमार चटर्जी व डा० अरविन्द बरुआ विशेष भाषण विया दीपि खः । २६ मई खुन्हुया सभाया सभापति प्रो० एन. के. सिद्धान्त भवाइस चान्सिलर कलकत्ता युनिवंसिटी जुया दिल । थौंया विशेष वक्ता श्री डा० कालिदास नाग व महाबोधि सभाया जेनेरल सेक्रेटरी श्री देवप्रिय वलिसिंह खः । खन्हुया नं सभाय् संग्रहीत वैनास्तक आदि सभा भःभः धायेकेगु नं यात ।

बम्बई :

१०००

२,५०० गृगु जयन्ती बम्बई शहरे नं तस्सक आकर्षक रूपं माने यात । छगू तःवंगु अमिसभाया नं आयोजन जुल, गुकिया सभापति बम्बई बुद्ध जयन्ती समारोह कमिटिया अध्यक्ष हानं बम्बईया गवरनर श्री हरिकृष्ण मेहताब जुया दिल । विराट जनसमूहयात सम्बोधन याना प्रधान मंत्री श्री नेहरु धया दिल, ‘जीवन-विज्ञान सयैकेगु, सीकेगु अले अभ्यास यायेगु यायेमाः, गुगु कि बुद्ध अन्धविश्वासं, ढौंगी पूजा आजाँ, धार्मिक विद्वेष भावना, छुवाछूतया पर्जा मुक्त जुइगु निति प्रचार याना विज्यागु खः’ प्रधान मंत्री श्री नेहरु हानं धया दिल, ‘बुद्ध छें लिहाँ विज्याना च्वन, गुम्हसित भीसं भचा ल्वमंके धुंगु खः, यद्यपि बुद्ध भीगु मनया कुं कुलामे व्याप्त जुया च्वंगु दु ।’

मद्रास :

थनया २,५०० गृगु जयन्ती आकाशं वायुयानया पुष्पत्रृष्टि प्रारम्भ जुल । अले छगू विराट जनसभा नं जुल, गुकिया सभापति आसन मद्रास राज्यया गवरनर श्री श्रीप्रकाशं ग्रहण याना दिल । छगू दर्जनं मयाक भाषण याना दीपि मध्ये श्री के. कामराजया नाँ उल्लेखनीय जू । सभापति आसनं दना श्री श्रीप्रकाशं धया दिल, बुद्ध्या महापरिनिर्वाण जूगु नीन्यासः दं दत, तर अयनं वसपोलयागु उपदेशं थौंतकं विश्वे बांलाक प्रभावित याना तःगु दनि । वसपोलयागु व्यक्तित्वं व उपदेशं छुवाछूत मद्येकेगु व युद्ध पिपाशी जुजुपित शान्ति शिक्षा भीगु, प्राणी हत्या मुक्त जुइगुली आपालं सहायता बिल ।

हैदराबाद :

२,५०० गृगु महापरिनिर्वाण बुद्ध जयन्ती हैदराबाद नं बांलाक माने यात । बौद्ध ऐतिहासिक स्थान एलोरा व नार्गा-

जुन कुंडे नं विशेष प्रकारं समारोह जुल । स्वांया-पुन्ही खुनु
५०० म्ह कैदी तोता व राज्यभरी हिंसा बन्द याके बिल,
नापं अय्ला पसः नं बन्द यात ।

सिक्किम :

२,५०० गूगु जयन्ती सिक्किम रंगेलीबजारे गुगु रूपं जुल,
व क्लायप्राया सौन्दर्य बहुसंख्या जन उत्साह पूर्ण उत्सवया
दृष्टि अनुपम व अभूतपूर्व खः । थव जयन्ती माने यायेत न्हापा
हे बुद्ध-पूजा कमिटि दयेकूगु खः । सुथे प्रभात फेरी व
बुद्ध-पूजा द्वलंद्व मनूत मुना श्री नरेन्द्रनरसिंह शाक्यया नेतृत्वे
जुल । अले पायःक्रि १२ ता इले निहने बुद्ध प्रतिमा जुलस
नापं शहर परिकमा जुया लिपा हो० मजिस्टेट मु. पासांग
छिरिंगया सभापतित्वे जनसभा रूपे परिवर्तन जुल । सभाय
आपालंसिनं भाषण नं यात । बहनी निसें पूजा जूगु अहोरात्री
तकं जुल । कन्हे खुनु सिक्किम महाराज कुमार पि. टी.
नामोल सवारि जुया न्हूगु निर्माण जुइगु बुद्ध विहारया
शिलान्यास याना दिल । तदन्तर छगु विराट सार्वजनिक
सभा एजुकिटिम कौन्सिलर श्री काशिराज प्रधानया सभाप-
तित्वे जुल । सभाय महाराजकुमारं धया दिल, २,५०० गूगु
जयन्तीया उपलक्ष्मे थव रंगेली बजारे नवनिर्माण जुइगु बुद्ध
विहारया शिलान्यास याये दया जित साब लयूता वः । हानं
थव विहार याकनं निर्माण याना, थुकि बुद्ध-धर्म प्रचारया
निंति पलाः छिना विश्वशान्तिया लैं न्ह्यब्बाये फइ धयागु
आशा दु । समारोहे स्वां व भण्डा नापं मनूतय्गु भीड़या
तस्सकं विशेषता दु । सभाय भाग कायेया निंति १८ गू मील
तापाक च्वंगु गां गामं स्मेतं मनूत सम्मिलित जू वल ।

कालिम्पांग :

समाचार ज्ञात जूगु दु, २,५०० गूगु जयन्ती कालि-
म्पोंगे नं धुमधामं यात । थुकिया आयोजन छगु बुद्ध जयन्ति
कमिति याःगु खः । जुलस व जनसभा एवं पूजादिया कार्य-
तस्सकं सराहनीय नापं स्मरणीय जू । ● ● ●

फाकिस्तान :

२,५०० दँया जयन्ती गबले जुइ धका छको सः पिहाँ
वये धुंका ततःधंगु बौद्ध सभा संघया पाखें २,५०० दँ
क्यनीगु रूपं महापरिनिर्वाण तिथिया उत्सव थव देँ हे धका
लिसः बीवं वस्तुस्थिति बुझे जुल, अले पाकिस्तानं गुगु समा-

रोहया तयारी यात व ऐतिहासिक व सांस्कृतिक रूपं तसकं
महत्वपूर्ण जू । ढाका, चितगांव, करांचिया जयन्ती समारोह
उकी मध्ये अविस्मरणीय खः । चितगांवया “नियास स्टा-
यूडियमे” ढाका विश्वविद्यालयया दर्शन विभागयाम्ह नायः
डाक्टर गोविन्दचन्द्र देवया सभापतित्वे बुद्ध जयन्तीया
विराट जनसभा छगु जुल, गुकी पाकिस्तानया राष्ट्रपति जेन-
रल स्कंदर मिर्जाया सन्देश ब्वना न्यंकल । हानं चितगामे
हे मेथाय छगू पाकिस्तान बुद्धजयन्ती संघया तत्वावधाने अन्त-
रराष्ट्रीय सम्मेलन जुल, गुकी देश विदेशया प्रतिनिधिपिसं
भाग काल । सिलोन हाइ कमिशनर मि० टी० बी० जयया
भवने छगू सभा जुल । सभाय भाषण याना दीपि मध्ये
पाकिस्तानया वाणिज्य मन्त्री एच० आई० रहिमटुला,
जापानया राजदूत मि. यामागाता, बर्माया राजदूत ऊ. अं
सेन् व भारतया हाइ कमिशनर मि. डी. एन् चटर्जीया नाँ
उल्लेखनीय जू ।

लंका :

महापरिनिर्वाणया २,५०० गू जयन्ती लंकां छगु समा-
हया कार्यक्रमं गुगु रूपं विशेष प्रकारं माने यात, उकिं लंकाया
बौद्ध उत्सव व संस्कृतिया इतिहासे छगू अध्याय तंवनीगु जुल ।
कोलम्बो आदि शहर छगुलिं गुगु रूपं भःभःधायेका तल, स्वां
आदिं सजो यायेगु यात अर्थे गबलें छको धका हे मजूनि ।
२२ मई खुनु कैदीत आपालं तोतल । २३ मई खुनु धार्मिक
पाठ, दान व अष्टशील पालन आदि जुल । २४ मई कोल-
म्बोया इण्डिपेन्डेन्स स्वायरे छगू विराट जनसभा कांडियाया
माननीय ससरण सरण सरणांकर महानायकया सभापतित्वे
जुल, गन बुद्ध जयन्तीया विशेषता व महत्व विषये
भाषण जुल । सभाया प्रमुख वक्ता प्रधान मंत्री मि. एस.
डब्ल्यू. आर. डि. बंदरनायक खः । गवर्नर जेनरल सर
अलिमर गुंटिलेंट छगू विशेष सन्देश बिया हया दिल । हानं
जापान, थाइलैंड, बर्मा आदि देशया प्रतिनिधिपित विशेष
स्थान बीगु व भाग कायेगु यात ।

बर्मा :

निंदं न्ह्यो निसें २,५०० गूगु जयन्तीया महत्व व उकिया
प्रति व्यक्तिया, समाजया, राष्ट्रया कर्तव्य विषये प्रचार व प्रसार
याना संगायन याःगु बर्मा खुगू गु संगायन सिध्येकेगु व जयन्ती
माने यायेगु निंति गुगु प्रकारं व्यक्ति व्यक्ति, छें छें, समाज

समाजं व राष्ट्रं माने यात व बर्मिया धार्मिक व राष्ट्रीय, एवं सांस्कृतिक इतिहासया क्वपौ स्वर्ण अध्याय खः । थ्व हे ऐतिहासिक महापापाण गुहा समिपस्थ च्वंगु “घःवाई” [विश्वानित महा चैत्य] पूजाया निंति स्वंगू लाखति मनूत सम्मिलित जुल । २,५०० म्ह बर्मी युक्तपिसं तथागतया शरणे वया श्रमण दिक्षा काल । बर्मिया राष्ट्रपति डा. बा. ऊ व प्रवान मंत्री ऊः नुपिसं भिक्षुपिंत महादान यात । स्वैडगौं पगोडा व सुले पगोडाय् नं लखौं मनूतयेसं श्रद्धांजलि अर्पण यात । समाचार न्यने दु, प्रधान मंत्रीया म्हाय् सह आपालं मिसान नं अनागारिक दिक्षाय् दिक्षीत जुल ।

ज्ञापान्तः :

२,५०० गूगु बुद्ध जयन्ती युद्ध चोटुं लिपा शान्तिया निंति शायद सर्वाधिक इच्छुक देश जापानं स्वन्हु तक धुमधामं माने यात । प्राचीन राजवानी क्योटोस द्वलंद्र मनूतयेसं बुद्ध-बचन (धर्म ग्रन्थ) या पाठ यात । अले क्योटो शहरया समिपस्थ ‘ही’ पहाड़या शिखर स्थित इनापा-कु-जी महाविहारे स्वन्हु तक सभा नं जुल ।

चीनः :

जनवादी चीने २,५०० गूगु जयन्ती अनया बौद्धपिसं गुगु रूपं माने यात व चिरनूतन खः । द्वलंद्र बौद्ध भिक्षुपिसं विहार छायपा पूजा पाठ यात, गुकी तिब्बत व यूनान प्रदेशया बौद्धपिसं नं भाग काल ।

सोवियत रूसः :

२,५०० बुद्ध जयन्ती सोवियत रूस स्थित फुक बुद्ध मंदिरे बांलाक माने यात । सोवियत रूसया धर्मे दक्षिणे च्वन्ह्याम्ह हाम्बित विहारया धार्मिक गुरु लुस-बान-निमा डाँ धर्मया विषये उपदेश यात । वेकलं थःगु उपदेशे सारांश रूपे धया दिल, थ्व विश्व व्यापि २,५०० गू बुद्ध जयन्ती माने याना च्वंगु देशे शाश्वत शान्ति बीगु भगवान बुद्धया अमर आदर्शया समूर्ण अवस्थाय् थ्यनीगुया प्रतीक खः ।

वियतनामः :

२,५०० गूगु विश्व व्याप रूपं माने याना च्वंगुली छगू प्राचीन बौद्ध देश वियतनामं नं समुचित रूपं वियतनामया राजधानी हानोईस बुद्ध जयन्ती समारोह माने यात । अनया प्रधान क्वांशु विहारया तान् लुंग गेट भिक्षुं नवाना आशा

प्रकट यात, याकनं हे विश्व बौद्धत मिले जुया धर्म विश्वयात भिं यायेगुली समुचित प्रयत्न याइ ।

सिंगापुरः :

२,५०० गूगु जयन्ती सिंगापुरं नं देश व्याप्ती रूपं बांलाक माने यात । फुक बौद्ध विहारे समीपस्थ गृहस्थिपिसं पाठ-पूजा व दर्शन यात । थुकिं अतिरिक्त छगू रथ यात्रा नं बांलाक छायेपा पिकाल, गुगु स्वयेत तातापाक च्वंगु देशं नं मनूत एकत्रित जुल एवं प्रदीप-पूजा याना ‘सदा भवामि दीपको’ थें जागु भावना हृदयं पुनरावृत्ति यात ।

जेकोस्लोवाकिया :

२,५०० गूगु जयन्ती फुक देशया प्रायः राजधानीं माने याःथें विश्व शान्तिया प्रेरक शान्तिनायक भगवान बुद्धया जयन्ती जेकोस्लोवाकियाया थःगु राजधानी प्रागं नं धुमधामं माने यात । अले उकिया अनुरूप प्रागया प्राचीन युनिभसिटीया पालि व पालि बुद्धदर्शनया प्रोफेसर डा० आह्वो फिसरं थःगु भाषणे बुद्धधर्मे २,५०० गूगु बुद्ध जयन्ती महत्व विषये दिग्दर्शन याना दिल ।

जर्मनः :

२,५०० गूगु महापरिनिर्वाण जयन्ती जर्मन नं मेगु देशयासिबे ल्यूने मलाक यात । बोन स्थित सिलोनी चार्ज दि अफेयसं मिस्टर एस्. पि. विकमसिंह बौद्ध झण्डा तोलण यात । छगू असाधारण विराट जनसभा नं जयन्ती समारोहया सिल्सिलाय् जुल, गुकी जर्मनया स्वंगू बौद्ध सभाया सदस्यपि उपस्थित जूगु खः । हानं भारत, पाकिस्तान, बर्मा, जापानया दूतावासयापिसं जयन्ती समारोहया महत्व विषये नवात । थथे हे पश्चिम बर्लिन विश्वविद्यालये नं जयन्ती उपलक्षे सभादि जूगु सः दु ।

इंग्लैंडः :

२,५०० गूगु जयन्ती लन्दनं बांलाक धुमधामं माने यात । जयन्तीया प्रारम्भ छगू सभा द्वारा यात, गुगु विराट सभाय् एसियाया ११ गू राष्ट्रं व बौद्ध संघया प्रतिनिधिपिसं भाग काल । सभाया सभापति लंदन स्थित लंकाया हाइकमिश्नर सर क्लिंडि कोरेया जुया दिल । हाइकमिश्नरं ४४ म्ह भिक्षुपिसं अनुवाद याना तःगु त्रिपिटकया छुं भाग सभाय् उपस्थित [ल्यंगु कवर पेजे]

धर्माद्वकीय

चिरनूतन खः, सिद्धार्थया जन्म दिः; चिरस्मरणीय खः, वसपोलया बुद्धत्व-प्राप्ति दिः; चिरदाही अविस्मरणीय खः, तथागतया महापरिनिवाणि ! जन्म, बुद्धत्व-प्राप्ति, महापरिनिवाणिया स्वंगु गुण सम्पन्न व पवित्र स्वांया-पुन्ही, २,५०० सः हृ क्यंगु महापरिनिवाणि तिथिया वंगु समारोह ऐतिहासिक खः, अन्तरराष्ट्रीय सांस्कृतिक व धार्मिक दृष्टिं अभूतपूर्व खः, अले राजनैतिक विश्वशान्ति दृष्टिकोणं महत्वपूर्ण ! नेपाल, भारत, लंका, बर्मा, चीन, जापान आदि एशियाई देशं व जर्मन, इंग्लैंड आदि पाश्चात्य देशं राजधानी शहर शहरे, गां गामे, छें छें, क्वम्ह क्वम्ह मनूया हृदयं गुगु सोत्साहं थुकी भाग काल, उकिं प्रभावित जुया हे थ्व अंके समाचारयात प्रधानता बिया । यद्यपि थ्व दिया संस्मरणं प्रेरित मनुखं तथागत प्रति याःगु कृतज्ञ-ज्ञापन व पाठ, व पूजा, व स्तुतिया अर्थ थ्यायेगु हानं मानवया हार्दिक श्रद्धाङ्गलिया वर्णन यायेगु थ्व क्विगु स्वंगूचा फर्मागु ‘धर्मोदय’ या निति सम्भवगु खँ मखु, न विभिन्न देशया अनेक विराट जनसभाय् जूःगु विद्वान-विद्वीपिनिगु बुद्ध-धर्मे दिग्दर्शित सारगर्भित भाषणया सारांश बीगु सम्भव दु, न सहज सरल सुबोध सत्यया संस्मरणया हानं द्वको पुनरावृत्ति यायेगु हे ! युग्या लभ्य साधन रेडियो, आकाशवाणी, प्रेस, रिकार्ड, अभ फील्मं स्मेतं बुद्ध व बुद्धधर्मया थ्व देँ गुगु सम्मान यात, सेवा यान, उकिं बौद्ध इतिहासे क्वगु अध्याय तन । थ्व हे अविस्मरणीय खँया, अध्यायया किंचित संकेत रूपे थन समाचार सविस्तार प्रकाशित याना च्वना ।

मेगु दिशा पाखे उकिं ‘धर्मोदय’ विवश खः, विशेषांके पिदने मफुगु कविता, कहानी, एकांकी, निबन्ध आदि रचनाया लेखकपिंत थ्व अंके नं निराश याये माल । अभ गत अंके सांकेतिक रचना स्मेतं प्रकाशित याये मफुगु थःगु अद्वदर्शिताया प्रदर्शन सिवे छु जुइ ! अले ला थौं न्हून्हूगु छवया हःगु, त्हाते बिया हःगु, कया हे हयागु रचनाया नं यथाशीघ्र ‘धर्मोदयं’ समुचित सम्मान याइ जकसाँनि धायेमाल ! हानं ‘धर्मोदय’ उपि महानुभावतये प्रशंसक खः, गुपिसं ‘विशेषांक’ या कदर याना दिल, प्रेम क्यना दिल, अले ग्राहक नं जुया दिल । अयनं जिमिगु योजनानुसार ग्राहक संख्याय् प्रा मजूनि, उकिं आः दुपि नीप्यम्ह थः प्रचारक व एजेण्टपिंके अभ सहयोगया निति आशा कया, नेपाल भाषा भाषापिंके ग्राहक जुइगु योगदानया अपील याना । वइगु अकं निसें प्रथम प्रयास रूपे छ्वया हःगु रचनाया क्रमशः प्रकाशनार्थं छगु पृष्ठ-स्तंभया नं नमोबागि जुइ ।

आः २,५०० गूगु जयन्तीं लिपा बौद्ध जगतया सर्वाधिक चर्चा बौद्ध तीर्थस्थानया यात्रा व प्यंगूगु विश्व बौद्ध सम्मेलन सम्बन्धी खः । वंगु जयन्तीं असंख्य नरनारीपिंत बुद्धया जीवन सम्बन्धित लुम्बिनी, बुद्धगया, सारनाथ, कुशीनगर आदिया दर्शन यायेगु उत्कल इच्छा, पुर्नदर्शनया अभिलाषा जुल । थुखे हे लक्ष्य याना भारत सरकार नं बुद्धजीवन सम्बन्धित जक मखु, बौद्ध संस्कृति, कला व इतिहास सम्बन्धित तीर्थस्थान नापं कलकत्ता, बम्बई आदि लेँ लेँ स्वाःगु शहरया भ्रमणार्थ नं रेलया भारा विदेशी यात्रीपिंत बच्छ याना बिल । बंगु १ मई निसें वइगु ३१ दिसम्बर तकयात थ्व प्रबन्ध खः । भनिभति थ्व कन्सेशनं भ्रमण याःपि नं दत । तर सर्वाधिक संख्याय् नवम्बरं बौद्धयात्रीत दर्शनार्थ वइ ।

नेपालया निति रक्सौल, सितमरही, जयनगर, निरमली, नौतनबा, वैरगिया, नेपालगंज रोड, कटरनिया घाट, धानगरहि, जनकपुर, जोगबनि, दार्जीलिंग, सिलगुरी, कर्सियाङ्ग, ध्रुम स्टेशने कन्सेशन टिकट प्राप्त जुइ धका भारतीय राजदूत, काठमाण्डूया सूचना विभागं प्रेस नोट नं ३२ स २ जुलाई १९५६ खुनु प्रकाशित याःगु दु । कन्सेशन कायेत काठमाण्डू स्थित भारतीय राजदूत व बीरगंज, नेपालगंज, पात्पा (तानसेन), विराटनगर स्थित दृतावास सम्बन्धित अधिकारी-वर्ग पाखे तिर्थयात्रीयात प्रमाण-पत्र क्वपै प्राप्त जुइ । यात्रा क्विगु इच्छानुसार रेलवे दृष्टि क्रमबद्ध याना टिकट बनेगु बत्ति दामं लिहाँ वयेगु नं प्राप्त जुइ । तर थ्व खँया व ज्याया निति न्हापां थःगु थासं सन्निकटगु स्टेशनया अधिकारीवर्गयाके न्यना स्वयेमाः । कारण वंगु १४ जुलाई खुनु श्री तुलसीराज तुलाधर प्रमुख प्यम्ह मिसापि यात्रीत रक्सौलं कन्सेशन टिकट प्राप्त मजुगा थन थ्यंकः भाल । क्वायकि कन्सेशनया समाचार वंगु अंके प्रकाशित याना । यात्री-मण्डलया शिकायत दु, अथे हे मेर्पि

न गुलि लिहाँ हे वन, गुलि जक जगन्नाथ वन। उकिं च्वे उल्लेखित स्टेशने क्को सन्निकट बौद्धसंघ सभां वा छुं सोसाइटीं इन्कायरी यायेगु जिमिगु प्रेरणा दु, आग्रह दु। जिमिगु रक्सौलं प्रेस नोट अनुसारं हानं प्रमाण-पत्र दयेक नं उक्त यात्री-मंडलयात कन्सेशन टिकट मब्यूगुया विषये प्रेषित पत्रया लिसले यात्रीमंडलं कष्ट उठे याःगुली खेद प्रकट याना सम्बन्धित कार्यवाही यानावं च्वनागु दु धयागु खैं उल्लेख याना हःगु दु। उकिं जिमित आशा दु, आः रक्सौलं नं कन्सेशन टिकट प्राप्त जुइ, वर्त्ये १४गू उपरोक्त स्टेशनं नं ! थन कलकत्ता आदि थासं ला प्राप्त जु हे जू गथे उक्त मंडलयात प्राप्त जुल ।

सप्रसंग थन यात्रीतयेत नं छुं च्वये । यात्रीं सरकार पाखैं प्रतिबन्ध तया तःगु अफिम आदि अजागु छुं वस्तु ज्वना दी मत्य, कारण थुकिं थः यात्री-मण्डलयात जक दुःख व कष्ट जुइगु मखु, अपितु क्रमसिगु कारणं फुक यात्री-मण्डल संशंकित दृष्टिया शिकार जुया जांचे याकेगु भंझउ व संकष्टे क्यनी । हानं सुं यात्रीं वा यात्री-मण्डलं अजापिं लैं पासा नाले मत्य, गुपिं पूर्ण विश्वासी व परिचित व्यक्ति मखु । सुं लैं पासा नाला इमिगु सामान ज्वना बीगु ला भं द्विं ‘धर्म यानां पापं पुं’ धका धायेका च्वने मालीगु जुइ फु । यात्राया निंति प्यांगूगु विश्व बौद्ध सम्मेलन स्वये धुंका हे यायेगु सर्वाधिक उचित समय व सुविधाजनक जुइ । जिमिगु कामना दु, लंका, बर्मा, तिब्बत, जापान आदि देशं द्वलंद्र यात्रा याइयें नेपालं नं सुखं, सुविस्तां यात्रा याये फयेमा ! दयेमा !

थ जक न्हाय् ध्यना स्वर्ग खने दइगु खैं खः । क्कगू प्रधान बौद्धतीर्थ स्थान थःगु अंचले दुने तया तःगु नेपालं छुं यात्रीपित सुविधा जुइगु प्रबन्ध याये मफु । खैं निखैं खुक्के न्हेक्वे, खुक्वे न्हेक्वेतियागु लँया खः, तर अयूनं उखैं वःसा न्यासि वये मालीगु, थुखैं वःसा ढाइभर शाहीं शासित जुइका च्वने मालोगु । नौतनतां मेरहवा तक वनेत नं लाहुरेत क्कथ्वः खनेवं न्हापा च्वं च्वंपि फुक यात्रीतयेत रिजव धया क्वकाइपि ढाइभरया ल्हाते विश्व यात्रीत लः ल्हायेगु बांमला: । अन्यथा र्लानि अनुभव याका, क्षेष्म व भर्त्सना याका च्वने माली । मेरहवां भैरहवा जुना लुम्बिनी वनीगु लँ याकनं तप्यंके माल, अले सरकारी बस हे विशेष सुविधा रूपं प्रबन्ध याना बीमाः । निर्माणिया ज्या अपूर्णविस्थाय् तिनि, लँ अर्थैं तिनि । अयूनं उद्धाटन जक यायेमानि धका सुनानं सुयातं धायेवं सुकां पत्याः जुइ ? थुखैं खयेत ला कन्सेशन नां कायेत अमलेख गंजं रक्सौल तक तहाःगु लँ मखु, तर थ चिहाःगु यात्रा जुया कन्सेशनया प्रबन्ध याः सा छुं थाकुगु नं ला मखु ! छु सरकारं थ खे ध्यान तइ ?

‘धर्मोदय’ या व्यापक प्रचार व प्रसारार्थ पोखरा, बाग्लुंग, बुटवल, भैरहवा, धरानयात प्रचारक व एजेण्ट माला च्वंगु दु । स्थानीय महानुभावपिसं व्यवस्थापक ‘धर्मोदय’ नामे पत्र व्यवहार याना दिसँ ।

यें, यल, ख्वप, भोट, त्रिशुली, तानसेन, भोजपुर, चैनपुर, बीरगंज, भिंफेरी, सिक्किम, कालिम्पोंग, दार्जीलिंग, तिब्बत, कपिलवस्तु, विराटनगरया प्रचारक व एजेण्टपिसं नं ग्राहक सम्बन्धी पत्र व्यवहार व्यवस्थापक ‘धर्मोदय’ नामं हे याना दीगु कृपा तया दिसँ । सम्पादक नामं वा सहायक सम्पादक ‘धर्मोदय’ नामं मखु ।

धर्मोदय सभा पाखैं प्रकाशित सफूया विषये पत्र व्यवहार नं कृपया व्यवस्थापक ‘धर्मोदय’ नामं याना मदीसे सभाया केन्द्रीय कार्यालय, श्रीघः विहार, नघः टोल, काठमाण्डू नामे याना दिसँ । —व्यवस्थापक

धर्मोदय समाया न्हू सदस्यत

[थव दँया न्हू सदस्यपिनिगु क्रमशः चउला अंक तकं ७४ ह्यसिगु नामावलि प्रकाशित जुइ धुंकल। थव वयां लिपा सदस्य जुयादीपि वा बिज्यापिनिगु नामावलि खः]

७५ श्री कृष्णबहादुर मानन्धर, ढोका टोल, कान्तिपुर, ७६ श्रीमती लक्ष्मीदेवी मानन्धरनि, किण्डोल विहार, ७७ श्रीमती रत्नदेवी उपासिका, छेत्रपाटी, ७८ श्री ध्रुवभक्त, रविभवन, ७९ श्री लोकरत्न, असन चलाञ्चे, ८० श्री आशाराम शाक्य, यम्पिविहार, ८१ श्रीसाहु जितबहादुर धार्खा, अकिंबहाल, ८२ श्री चित्तधर उपासक, न्यत तुंड्रे, ८३ श्री नेमराज बज्राचार्य, नकबहिल, ८४ श्री तुइसि उपासक, मुसुंबहाः, ८५ श्री भक्तमुनि बज्राचार्य, वांगेमुढा, ८६ श्री रत्नमान बुद्धाचार्य, वंश गोपाल टोल, ८७ अनागारिका विशाखा, किण्डोल विहार, ८८ अनागारिका धम्मानन्दी, किण्डोल विहार, ८९ श्री अनागारिका पारमि, किण्डोल, विहार, ९० श्री दि० कृष्णनारायण, क्वादों, ९१ श्री हर्षरत्न ताम्राकार, मरु टोल, ९२ श्री चैत्यरत्न तुलाधर, नरदेवी पसः ननी, ९३ श्री केशबहादुर आचार्य, केल टोल, ९४ श्री ना. सु. हर्षदास तुलाधर, असन न्हैकं तला, ९५ श्री बैकुण्ठप्रसाद लाकौल, महाबौद्ध, ९६ श्री भीमराज शाक्य, इनाचा टोल, ९७ श्री जोगरत्न, ऐ., ९८ श्री सुगतराज, ऐ., ९९ श्री आनन्दराज शाक्य, ऐ., १०० श्री गणेशराज शाक्य, ऐ., १०१ श्री अष्टवज्र शाक्य, ऐ., १०२ श्री पुण्यरत्न शाक्य, ऐ., १०३ श्री सर्वार्थसिद्ध, ऐ., १०४ श्री चैत्यरत्न शाक्य, ऐ., १०५ श्री रत्नराज शाक्य, ऐ., १०६ श्री नारायण गोविन्द, मंजेश्वरी, १०७ श्री पूर्णमान ताम्राकार महाबौद्ध, १०८ श्री मोतिकाजी तुलाधर, महाबौद्ध, १०९ श्री चन्द्रमान उपासक, कमलाछि, ११० श्री रत्नमाया उपासिका, दिल्लीबजार, १११ श्री हेरामाया उपासिका, दिल्लीबजार, ११२ श्री गम्भीरमान श्रेष्ठ, जुद्धसडक, ११३ श्री कर्मशोभा उपासिका, असन, ११४ श्री दम्वरमान तुलाधर, किसिध्वाखा, ११५ श्री जनकलाल मानन्धर, मरु, ११६ श्री हेरामाया उपासिका, किलागल, ११७ श्री धनमाया

लत्तेमाया उपासिका, कोहिटी, ११८ श्री पुनमाया उपासिका, किलागल, ११९ श्री अष्टमाया उपासिका, किलागल, १२० श्री रत्नमाया उपासिका, वं बहाः, १२१ श्री लक्ष्मीमाया शोभामाया उपासिका, कोहिटी, १२२ श्री हेरामाया उपासिका गुच्चा टोल, १२३ श्री दीपनारायण मानन्धर, मरु हिटी, १२४ श्री तेजहर्ष उदास, असन, १२५ श्री कृष्णमाया उपासिका, ख्योक्यव, १२६ श्री अनागारिका सुचित्ता, किण्डोल विहार, १२७ श्री नीलहेरा उपासिका, न्हू बहाः, १२८ श्रीमती महालक्ष्मी बज्जै, न्यतपाचो, १२९ श्री चन्द्रमान दंगोल, लखुंतिर्थ, १३० श्री संतोषीमाया जयन्तीदेवी, चोखा छें गल्ली, १३१ श्री तिर्थकुमारी, बटु टोल, १३२ श्री ज्ञानकाजी शाक्य, क्वादो बेखा टोल, १३३ श्रीसाहु धर्मवीर राज्यवीर, असन, १३४ श्री रत्नकाजी, भोटाहिटी, १३५ श्री द्वारिकाप्रसाद, फसिकेव, १३६ श्री सुवर्णमान तुलाधर १३२ नरदेवी टोल, १३७ श्री बुद्धरत्न शाक्य ठंहिटी, १३८ श्री किर्तिबहादुर केशबहादुर, वंगल, १३९ श्री डा० जगतचन्द्र मोहन, दुगंबहिल, १४० श्री कृष्णबहादुर ताम्राकार, मरु पिगंननि, १४१ श्री सूर्यराज बज्राचार्य, मरु तग्ब चिबहा, १४२ श्री जगतमान महर्जन, बलम्बु, १४३ श्री कृष्णउपासक छंबु, १४४ श्री शंखरलाल उपासक, खाद्यांटोल, १४५ श्री सूर्यदास किरण, तपचाल, १४६ श्री आनन्दमुनि बुद्धाचार्य, इनाचा टोल, १४७ श्री बुद्धरत्न बुद्धाचार्य, खमा बहाल, १४८ श्री दिल्लीशोभा उपासिका, १४९ श्री ज्ञानितता उपासिका, मुसुं बहाः, १५० श्री रामपति ताम्राकार, मरु टोल, १५१ श्री भक्तवीरसिंह, न्होखा टोल, १५२ श्री बद्रिलाल श्रेष्ठ, कमलाछि, १५३ श्री सप्तमाया तुलाधरनी, बनियाचुक, १५४ श्री कुलीशरत्न गणेशमाया, त्यौड, १५५ श्री बुद्धिरत्न न्हुछेमाया, त्यौड, १५६ श्री आशामाया तीर्थदेवी, बनियाचुक, १५७ श्री हेरामाया ठंहिटी, १५८ श्री अष्टरत्न उपासक, टेबहाः, १५९ श्री लानिमामा साहुनी, भंसा छें, १६० श्री रत्नमान बुद्धाचार्य C/O थायू मदु, १६१ श्री धर्मरत्न, कलकत्ता।

जूपि एसियाइ ११ गू देशया प्रतिनिधिपित्त दान विल । सर कोरेयां थःगु भाषणे सकसितं संबोधन याना धया दिल, प्रेम व सहिष्णुनाया गुगु शिक्षा संसारयात भगवान बुद्ध विया बिज्यात, व हे कार्य रूपे हयेगु प्रयत्ने थ्व जयन्ती वर्ष बिते जुइ, गुकिं विश्वया नर नारीपित्त थुकिं प्रभावित जुइ, अले भिं नं जुइ ।

भारतया लंदनस्थित हाइ कमिश्नर श्रीमती विजयलक्ष्मी पण्डितं धया दिल, बुद्धधर्मं समस्त एसियाइ संस्कृती एकता हयेगु ज्या यात । पृथ्वीयात माः कि थःगु न्व्यानावं च्वंगु प्रगती थौं भगवान बुद्धं विया बिज्यागु सन्देशयात ल्वयेक वातावरण हयेगु । तदन्तर लंदनस्थित बर्माया राजदूत ऊँ क्वीन सभाय धया दिल, भगवान बुद्धयागु सन्देश २,५०० दूँ न्हापा विश्वयात गुलि महत्व पूर्ण व शक्तिपूर्ण नापं आवश्यक उलि हे थौं २,५०० दूँ लिपाया थ्व विश्वयात नं महत्वपूर्णनाप नापं आवश्यक जू । अले लंदन स्थित जापानया राजदूत मि. एन. मिसि धया दिल, बौद्धधर्म वयेवं जापानया संस्कृति व विचारे आपालं परिवर्तन हया बिल । बुद्धया शिक्षाय मानवतायात आश्रय प्राप्त जू । लंदनस्थित पाकिस्तान हाइकमिश्नर मि० मुहम्मद इकरम मुलां धया दिल पूर्वी पाकिस्तानया जनसंख्याय आपाः बौद्धपि दु । लंदनया बुद्धिस्ट सोसाइटीया सभापति मि. किसमस हंकुरिजं धीरता रूपं विचार प्वंकल, बिट्ठेनया बौद्ध संघे नं याकनं हे बल व शक्ति गाक वइ, अले थन नं १५१२० मह भिक्षुपि जुइ फइ, च्वने फइ । बुद्धिस्ट संस्कृति व चित्रकलाया छंगू प्रदर्शनीया उद्घाटन याना लंदन स्थित भारतया हाइकमिश्नर श्रीमती विजयलक्ष्मी धया दिल, बौद्ध चित्रकला एशियायात छपु सूत्रे चीगु छंगू तत्व खः । अले एशियाइ संस्कृति निगू पहः मदुगु खँ नं बौद्ध कलां हे धाइ ।

स्वीडुन्नः

२,५०० गू जयन्ती स्वांया-पुन्ही स्वीडनया राजधानी स्टकहोमे अनागारिक सुगतया निवास स्थाने विशेष प्रकारं बांलाक माने यात । स्वीडिस नर-नारीपि थ्व उत्सवे भाग कया बौद्ध शिष्टाचारानुसार बुद्ध-पूजा व पञ्चशील प्रार्थना नं यात । अनागारिक सुगतं भगवान बुद्धया जीवन चरित्रं मनू जीवनं प्रेरणा कायेगुली स्वतः प्रेरित जुइगु कथं जीवनी कना विज्यात । अले स्वीडने अध्ययनार्थ वना च्वंमह आनन्दकुटी विद्यापीठया भूतपूर्व आ.वि. सं.स.या सेक्रेटरी श्री नुक्षेबहा-

सूचना : छंगू मग्नु तःगुमछि हे कारणं याना 'धर्मोदय' जेष्ठ पुन्ही न्व्यो पाठक-पित्त थ्यंका वी मफुत । वइगु अंक पायूच्छि इले थ्यंका बीगु प्रयत्न याये । —सम्पादक

दुर वज्राचार्य पञ्चशीलया महत्व आधुनिक जगते उकिया आवश्यकता विशेष नवाना बिज्यात । अले अनागारिक सुगतया मैत्रीसूत्र पाठ उपरान्त जयन्ती विसर्जन जुल ।

विभिन्न समाचार

समाचार प्राप्त जूगु दु :

— श्यामया छगू विशेष समाचार प्राप्त जूगु दु, गुकी बुद्ध जयन्ती थुगुसी मखु वइगु दू धुमधामं याइगु चर्चा याना तःगु खः । समाचारे धया तःगु बुद्धया परिनिर्वाण दिने बुद्ध सम्बत् प्रारम्भ जूगु मखु, परिनिर्वाण दच्छिं दयेका बुद्ध संबत् छि निसें शुरु जूगु जुया नीन्यासः दिंया जयन्ती वइगु दू यायेगु युक्ति युक्त संगत जू । समाचारं हानं सुचित याना तःगु दु, भारत व नेपाले सर्व सुलभ मजूगु अष्टपरिस्कार पौ छ्वया हयेव श्यामं दान रूपे छ्वया हइ ।

मरणं तं ही जीवितं

बंगु आषाढ शुक्र पञ्चमी खुनु ७८ वर्षीय उपासिका मोतिमाया अजि दिवंगत जुल । स्वर्गीय अजि श्री सुन उपासकया माँ, दोछि दाँ छायाः श्री सुमंगल बौद्ध संघ छ्र्वें थंम्ह मेखें संरक्षिका जूम्ह सुमंगल विहार, ललितपुरया श्रद्धालु उपासिका खः । २९ जून खुनु नं तानसेनया छम्ह ६७ वर्षीय श्रद्धालु उपासक सूर्यलालया दिवंगत जुल, हानं २ जून खुनु नं भोजपुरया राजकुमारी उपासिकाया अवसान जुल । स्वर्गीय उपासक उपासिकापिनि प्रति नं समवेदना ! स्वर्गीय उपासक उपासिकापिनि प्रति निर्वाण-प्राप्तिया कामना !!

स्वर्गीय चमा राजकुमारीया नामं रत्नमंजरी अनागारिका पाखें 'धर्मोदय' यात चन्दा कं. रु.— ५।-

द्रंक छापे जुल

विशेषांक-सन्देशे आर. आर. दिवाकर गवरनर धुंका विहार प्रदेश जुइ मालं उत्तर प्रदेश जुल । अले हानं ४३२ पृष्ठ्यां बवेया चित्र-पृष्ठे आर्यताराया कलाकारया व नां छापे जुल, गुगु आर्यताराया किपा सभायाभावं छापे याये मफुत । उकिं थ्व आर्यताराया कलाकारयागु नां श्री कमलराज शाक्य जुइमाःगुली द्रंक छापे जुल ।

—लुम्बिनी प्राचीन ऐतिहासिक मूर्ति सीमदया चंगुलि हानं व हे कारणं स्थानीय जन-विश्वास पाना चंगुलि व हे प्राचीन प्रतिमाया प्रतिरूप न्हूगु मूर्ति दयेका पुलांगु मूर्तिया जःरिखे स्वांया-पुन्ही खुनु स्थापना जुल। मूर्तिया कालिगर भिचबहाया श्री पंचराज व कला निरीक्षक व निर्देशक श्री चन्द्रमान मास्के खः, दाता महाबौद्ध निवासी श्री जुजुमान ताम्राकार, अले भिक्षु धर्मालोक स्थविर जक थव फुक ज्याय् हःपा व्यूम्ह खः।

—वडगु कतिपुन्ही खुनु भोजपुरे कुलपरंपरानुसार चूडाकर्म जुया वया चंगु कथं आः आर्थिक संकष्टं बाह्येकाक नेपाः वना यायेम्बाक, हानं आर्थिक कठिनाई नं थःगु कुलकर्म याये मफयेका च्वनेम्बाक भोजपुरे तुं यायेगु निश्चय यात। हानं थुकी पूर्वाच्चलया व्यीपा, धरान, चैनपुर, खडावारी, लिला, फालिकाट आदि स्थानं नं सम्मिलित जू वडगु आशा याःगु दु।

—मेगु भोजपुरया समाचारे धया तःगु दु, जेष्ठ २२ व २३ गते खुनु विद्योदय हाईस्कूलया पञ्चम वार्षिक अविवेशन श्री गंगाप्रसाद भट्टराईया सभापतित्वे जुल। अले 'छाँगो' धयागु झूतु-पौ छगू नं साइझो द्वारा छापे याना पिदन, गुकी अंग्रेजी व नेपाल भाषायात नं स्थान व्यूगु दु।

—यें, 'च्वसापासा' या खुदं बुदि यतखाबहाले जुल। संस्थापक श्री प्रेमबहादुर कंसाकारं धौसगं बी धुंकेवं मंत्री श्री परमानन्दं रिपोर्ट न्यंकल। अले महाकवि श्री चित्तधर 'हृदय'यात 'साहित्यशिरोमणि', कविवर सिद्धिचरणयात 'कविरत्न', श्री धर्मादित्य धर्माचार्य एम. ए. पी. एच. डी०यात व भिक्षु धर्मालोक स्थविरयात 'भाषा जवाः', श्री फत्तेबहादुर सिंहजुयात 'भाषारत्न', श्री महाप्रज्ञायात 'साहित्य सुता' उपाधि देछाल। अले थुगु दें पिहां वःगु सफू मध्ये श्रेष्ठसिरपा कमिटि श्री सत्यमोहनजोशीजु रचित 'जयप्रकाश' महाकाव्ययात दके बालागु रूपे ल्यया: 'श्रेष्ठ सिरपा:' नं बिल, गुकी छगू पत्र, लुँया टक्मा व १६० तका नगद दां दुगु खः सभाय् देछा प्राप्तयाःपिनिगु व सभापतियागु पाखे भाषण नं जुल नापं मिसा मचा कु० मुशीलाया घितांमुनि

प्याखं तथा मिजं मचा न्हुक्षेबहादुरया राजमति प्याखनं मपूतयेत मंत्र-मुग्ध यात।

—ललितपुर विद्यार्थी साहित्य मंदिरया तत्वावधाने जूगु विराट महिला साहित्य सम्मेलन पाठ जूगु मध्ये कहानी, कविता, निबन्धे क्रमशः प्रथम, दुतीय, तृतीय, स्वम्ह स्वम्ह थुर्पि जुलः—सुश्री मुशीला, यल; लक्ष्मीदेवी, यें; गुलाफमैत्रा, यल; सत्यभामा, कमलमैत्रा, शंकरमाया, इन्दिरा, विजयादेवी, यें; रत्नदेवी ख्वप। समाचार प्राप्त जूगु दु, पाटन हाइ स्कूलया परीक्षा भवने श्रीमती नारायण-देवीया सभानेत्रीत्वे पदक वितरण समारोहस पदक-प्रदान नं जुल। (पुरस्कृत रचना मध्ये गुगु 'धर्मोदय' या नारी अंके प्रकाशित जुइ।)

—श्री ५ महाराजधिराजया जन्मोत्सव उपलक्षे ३४ म्ह व्यक्तिपित पदवी प्रदान जूगुली भीकवि चित्तधर 'हृदय' यात 'कवि-केशरी' पदवी प्राप्त जुल।

—चीन वनेत वःगु नेपालया सांस्कृतिक मण्डलयात कलकत्ता निवासी नेपाली साहु महाजन व जनतां ३०० नं क्लबे ६ जुलाई ५६ खुनु भारी च्या तुच्चा यात, गुकी मण्डलया नायः शिक्षा मंत्री श्री बालचन्द्र शर्मा, जनकवि धर्मराज थापा, कवि-केशरी चित्तधर 'हृदय' छु नवाना दिल। अले उखुनु हे सुथे श्री चित्तधर 'हृदय' जुयात कलकत्ता निवासी नेपाल भाषा भाषीपिसं महाबोधि सोसाइटी हले छगू स्वागत नं यात, गुकिया आयोजक श्रामणेर सुदर्शन, श्री नीलवीरसिंह, श्री माणिकलाल खः, सभापति आसन श्री देवप्रिय बलीसिंहजुं कया दिल।

—सुमंगल बौद्ध संघया तत्वावधाने नेपाले छगू तःधंगु बौद्ध पुस्तकालय तयेगु निति सभा जुल। हानं थुकिया आवश्यकता सर्वसम्मतं याये धुंका मेगु मिटिंगे 'सुमंगल बौद्ध पुस्तकालय' धका नाम करण नं यात। पुस्तकालयया निति गठित जूगु कमिटिया सेक्रेटरी श्री बुद्धरत्न शाक्य, असिस्टेंट सेक्रेटरी श्री ज्ञानबहादुर शाक्य नियुक्त जुल। हानं आशा याःगु दु, निकट भविष्ये हे थवं प्रयाप बौद्ध साहित्य संकलन याइ।